

國史列傳



滿漢大臣列傳

卷三十三

富爾賽

國

霖

伍彌烏遜

舒亮

阿必達

玉

德

黃文燦

額勒伯克

惠倫

富爾賽滿洲鑲黃旗人布雅穆齊氏由前鋒於乾隆三十三年隨征雲南積功補藍翎長三十六年從副將軍溫福征金川以襲班爛山二碉功奉

旨優敘拔前鋒校三十七年五月隨侍衛額森特攻東瑪寨克之

賞戴花翎十一月克路頂宗喀木色爾授藍翎侍衛

恩賞杜爾博特巴圖魯名號三十八年隨副將軍豐昇額勦達爾圖擲火彈由大碉攻破護碉短牆殲番賊甚多擢前鋒副參領六月奪賊碉二座于沙巴山三十九年由綽斯甲布進攻喀烈克拉木拉爾山十月從參贊額森特攻邁果爾喀烈各寨盡燬其巢遂由格魯克古丫口直抵大金川攻克阿邊作谷頂木

爾金剛諸石卡並奪回黨壩之路十一月克羣泥得竹低焚賊寨左膀受鎗傷事

聞得

旨獎賞十二月隨參贊海蘭察由控薩爾進攻四十年四月連克木思工噶克丫口石山峰碉樓石卡五月攻克噶爾丹喇嘛寺及僧克宗南山梁諸險隘授火器營正參領十二月以攻郎優若斯爾窪晝夜力戰賊碉盡奪奏入

勅部優敘四十一年攻克噶拉依金川平凱旋日

賜宴

賞緞疋荷包銀鏢奉

旨照平定準噶爾回部之例圖畫功臣像于紫光閣富爾賽與焉

命詞臣爲之贊四十五年軍政卓異四十九年帶兵赴甘肅攻獲石峯堡五十一年補甘肅金塔協副將尋調靜寧協副將五十五年授西寧鎮總兵歷署甘肅提督五十七年三月以承辦軍需出力奉

上諭勒保奏各起帶兵官員由西寧赴藏所有承辦軍需在事出力之西寧鎮總兵富爾賽著交部議敘以示獎勵嘉慶二年湖北教匪滋事勾結商州等處匪徒乘機竊發經陝西巡撫秦承恩調赴協勦四月馳抵商州逼賊于西牛槽時採玉窰有賊嘯聚富爾賽率騎越秦嶺兜擊之賊折竄入洵陽之兩河關秦承恩統大軍追勦賊竄午峪口富爾賽分兵搜擊後路廓清六月賊從鎮安黑洞溝繞至紫陽之沔峪河渡江欲奔川境富爾賽選勁卒裹乾糧從間道設伏截勦邀擊于土地嶺毛壩關大敗之八月四川總督宜綿調赴川省九月賊據深溪子鮮魚洞羊子岡馬渡關諸卡隘大兵分四路進富爾賽以騎隊會勦殲賊一千有奇奪卡座十三由邱家堡進勦攻克岳家院追擊于孫家梁生擒張志照等三十七人賊竄入巴州南背山富爾賽星夜繞至賊前與總兵朱射斗百祥等分三路夾擊賊驚潰又蹙之于排埡口甫安營賊率其黨來犯我軍併力下壓殲賊無算餘匪逕走蓬州之徐家場富爾賽兼程追撲殲執旗者一人殫賊甚衆十月賊目王三槐因追勦窮蹙遂由營山之迴龍場

直撲縣城富爾賽躡蹤尾至旋擊之于石山鋪又攻之于永興場蚊蟲溪三匯林壩等處大破之

諭曰此次宜綿奏各路殲斃賊匪自三四百名至千餘名不等亦不爲多而兵力本單所辦尙不遺餘力此時巴州竄往保寧之賊折向蓬州營山有富爾賽在彼截勦運道可保無虞是時分股賊匪羅其清折回營山屯九嶺子又踞芙蓉廟疊次攻擊先後俱有斬馘三年三月賊于永興場據對河白山寺窺伺渠縣又分股潛匿石梯坎以防我軍追襲富爾賽設法渡河開除林箐潛夜于上游置礮轟擊下游紮筏逕渡一躍而上佔據白山寺對嶺分軍兩翼直抵賊營出其不意殲斃無算其時附近匪徒聞聲麇至我軍往來衝突又斃賊六七百名獲礮位五生擒百三十有奇富爾賽兵出石埡子遇賊于孫家梁擊退之五月賊向三溪口奔竄富爾賽率兵迎截獲潘九和等三十餘名六月擊賊目王三槐于聖燈寺克楊子嶺進奪芝蔴嶺八月賊目王三槐遁至安樂坪經略勒保設伏勦富爾賽率勁兵斬奪木城痛加勦洗賊窘多觸崖石斃十月賊自祖師觀犯我軍富

爾賽由李家臺繞至賊後與總兵百祥等兩面夾攻賊無路奔竄生獲王良升等六十七名旋以病卒于軍營奉

旨富爾賽雖非陣亡但帶兵日久積勞病故亦屬可憫著給予卹典子國興阿現官三等侍衛次珠爾杭阿現官吏部筆帖式國霖富察氏鑲白旗滿洲人父文綬官四川總督自有傳國霖於乾隆三十三年由筆帖式授藍翎侍衛三十九年擢鑾儀衛治儀正三十九年遷雲麾使四十一年升冠軍使四十四年授頭等侍衛兼總理冠軍使四十七年四月因其兄山東巡撫國泰貪縱營私經御史錢澧劾奏

上命尙書和坤左都御史劉墉帶同錢澧馳赴山東查辦國霖適于是時遣家人赴伊兄任所

諭將國霖革職拏問交軍機大臣會同刑部嚴訊五月訊無寄信情弊

諭曰國泰之罪原無關於國霖之寄信與否著加恩賞給國霖三等侍衛在大門上行走贖罪四十八年升二等侍衛五十三年擢頭等侍衛五十五年授山東沂州協副將五十七年因該

管地方有搶劫傷差案部議降一級調用五十八年三月

命在三等待衛上行走洊擢頭等侍衛嘉慶四年正月授鑾儀衛總理冠軍使十一月授正白旗蒙古副都統時大兵征勦邪匪

命國霖管解軍需銀兩前赴川陝軍營五年正月奏陝省各路官兵所需鹽糧等項均應由省就近供支請將解到餉銀內撥留二十萬兩存省備用

從之二月奉

命留于陝省作爲領隊三月駐兵山陽截勦旋赴商維一帶扼要防堵四月奏有西來賊匪竄至商州軍嶺地方臣與侍衛愛星阿率同將領奮力擊斃三十餘名賊向北路翻山奔逸現探明所竄之路相機抄截

諭曰商維一帶面面皆山國霖與愛星阿督率兵勇扼住要隘勿令賊匪乘間竄出闌入豫省河南巡撫吳熊光奏陝省賊匪竄入商州國霖等未能攔住旋竄至保安街一帶距維南縣三十里查維南與豫省盧氏接壤並無官兵追勦國霖亦以附近



賊匪多至數萬入奏

諭曰國霖前奏在商州軍嶺地方將賊匪截回本日吳熊光奏稱賊匪竄入商州國霖等不能攔住或係國霖前奏不實或又係一股賊匪竄至國霖未行截回著額勒登保查明具奏又諭經略額勒登保曰國霖前在商州未能攔住楊開甲等股賊匪任其竄入淮南並奏稱附近賊匪多至數萬國霖素未經歷戎行其人本不足恃但亦行查明國霖在商州時如果兵力有餘並未與賊打仗輒稱賊匪數萬張皇入奏則既畏葸不前又復捏詞諉卸自應嚴加懲治額勒登保即當一面參奏一面將國霖革職鈕拿解京治罪如國霖實因賊多兵少與賊接仗不能攔阻尚非有捏飾亦應據實參奏現在額勒登保處帶兵得力之人自屬不少如國霖之庸懦無能留彼無益即飭令回候旨額勒登保尋奏國霖年雖五十餘歲而氣體軟弱實不能耐久辛苦當楊開甲等股賊匪奔竄之時國霖帶兵只有一千餘名趕赴軍嶺一帶期于截擊追勦其到時該匪業經前竄斬獲係零星落後之賊國霖仍復隨後尾追臣額勒登保帶兵到商

州時國霖猶在留仙坪一帶堵截尙無畏葸情事其所稱賊匪數萬詢係據探報未能查察之故亦非敢于捏飾希圖諉卸但帶兵打仗須強幹之員國霖究非所長若在京當差辦理尋常旗務尙堪稱職

上以國霖于帶兵打仗既不能得力

諭令回京十月授右翼總兵六年二月兼鑲黃旗漢軍副都統先是步軍統領衙門左右翼尉扎勒罕布岐山奉

旨兼管副都統事務經步軍統領布彥達賚告知扎勒罕布岐山遇有呈報事件不必書名并于考驗時亦令同坐至是

上命明安管理步軍統領事務明安偕左翼總兵恭阿拉及國霖奏向例各處大小衙門呈報事件未有不書名者步軍統領及左右翼總兵有統轄之責遇有八旗結報事件俱係該翼尉等書名畫押具結以專責成今不書名并于揀選旗員時同坐考驗與從前舊案不符

諭交軍機大臣會同兵部議奏尋議副都統兼攝翼尉呈報步軍統領衙門事件應照舊例書名畫押遇有揀選事件左右翼

總兵仍與步軍統領連銜具奏

諭曰向來滿洲大臣同列中往往欲自占身分各懷意見前此布彥達賚任提督時因有翼尉兼副都統之旨布彥達賚告扎勒罕布岐山遇有呈報事件不必書名並于考驗時亦命同坐彼時布彥達賚並未詳查舊例出自己見謙抑下人深合同寅協恭之意惟時恭阿拉國霖見步軍統領如此亦即隨同謙抑並未訊據舊例阻止及明安接任步軍統領後恭阿拉國霖扎勒罕布三人俱欲各爭分位殊屬卑鄙均著傳旨申飭國霖又偕明安恭阿拉參奏

恩賞八旗領催步甲摺雪銀兩有兵數不足翼尉協尉等扣銀給與外郎跟役情弊

命將扎勒罕布革職鞭責發落岐山革職賞給黏竿處拜唐阿並查出明安私用步甲四名國霖私用步甲十三名俱分得銀兩

諭明安交部察議國霖交部議處並傳旨申飭尋議罰俸

上以國霖係右翼總兵私用步甲較之步軍統領多至兩倍尤

屬非是著罰俸一年三個月不准抵銷十一月朝陽門外放米閉城時車馬行人爭先擁擠俱至海墘之上傾跌踐踏致斃男女十一命

諭曰步軍統領衙門京城內外一切稽查事宜是其專責此次朝陽門口于扃鑰時竟有多人擁擠致斃多命之事該提督等並未即時親往彈壓直至三更始據該營將備稟報前往查看殊有不合俟此案查審得實再候諭旨國霖尋偕明安恭阿拉奏稱城外海墘以上並非營員專管僅以營員具報遲延參奏並自請交部議處

上以所奏顯係有心推諉著嚴加議處部議降三級調用得旨從寬留任七年正月奉

旨國霖右翼總兵兼副都統不能照料步軍營事務著不必兼管副都統尋因失察戶部員外郎袁錫等在家鬪鶡番役訛索銀兩一案奉

旨交部嚴加議處部議降三級調用

上改爲革職留任六月調左翼總兵八年二月因病

賞假調理三月卒子華英三等侍衛兼公中佐領華封直隸試用理事同知

伍彌烏遜正黃旗蒙古人伍爾氏大學士伍爾泰子由藍翎侍衛於乾隆三十三年授三等侍衛三十七年補公中佐領四十年緣事降藍翎侍衛四十六年仍授三等侍衛五十一年十一月補佐領十二月承襲其父三等誠毅伯五十三年三月擢正黃旗漢軍副都統五月授烏里雅蘇台參贊大臣五十四年調科布多參贊大臣尋調蒙古副都統仍留科布多參贊任五十五年因失察俄羅斯烏梁海等在內地游牧奉

旨降一級留任五十六年調鑲黃旗滿洲副都統五十八年二月授內閣學士兼禮部侍郎五月調塔爾巴哈台參贊大臣六十年升兵部右侍郎仍留塔爾巴哈台參贊任嘉慶元年四月奏請塔爾巴哈台每年進貢馬匹由阿勒台進京可省內地台站傳送之勞奉

旨允准六月調兵部左侍郎仍留塔爾巴哈台參贊任九月因烏蘭扎舊屬厄魯特游牧之地厄魯特馬少遂爲土爾扈特親

王策凌烏巴什所居厄魯特請復其舊策凌烏巴什欲據而有之餽銀四百兩馬九匹以請伍彌烏遜斥回策凌烏巴什又送馬九匹復求察罕鄂博北邊之地借與過夏伍彌烏遜受馬一匹許之經保寧參奏奉

上諭伍彌烏遜如此辦理實屬錯誤土爾扈特厄魯特原各有分得之地土爾扈特地方又復寬濶人數亦較少于厄魯特土爾扈特欲將厄魯特原分之地佔據卽屬非是今又欲奪厄魯特等原分之地伍彌烏遜查明斥駁不准土爾扈特佔據卽策凌烏巴什希圖便宜行賄伍彌烏遜尤當以理訓飭全行駁回伍彌烏遜初將策凌烏巴什銀兩駁回伊等業經計窮次日又餽馬九匹懇請將察罕鄂博卡倫迤北五十餘處借給過夏伍彌烏遜又恐礙策凌烏巴什顏面收馬一匹卽照伊所請借給實屬怯懦糊塗已極況察罕鄂博卡倫迤北地方夏季放卡雖與哈薩克相去稍遠而冬季撤卡之時哈薩克皆入近邊一帶游牧土爾扈特等性好便宜伍彌烏遜夏季將此處借給至冬季伊等竟不肯移與哈薩克等雜處倘滋生事端伍彌烏遜又

將何如辦事耶伍彌烏遜尙欲將此地可否永遠賞給策凌烏巴什游牧之處咨問尤屬胡說伊意不思哈薩克冬季仍遷入近邊乎看來伍彌烏遜不勝塔爾巴哈台重任著嚴行申飭仍交部嚴議十二月

諭曰伍彌烏遜著照部議革職現在哈密辦事大臣佛住往達州軍營俟成功之日另行升用外此缺加恩賞給伍彌烏遜三等侍衛自備資斧前赴哈密協同僧保住辦事三月仍襲三等誠毅伯四年奉

上諭伍彌烏遜在新疆有年卽著伊回京五年到京因病乞休六年卒子拉錫格里克承襲三等誠毅伯

舒亮正白旗滿洲人蘇佳氏由前鋒于乾隆三十三年補前鋒校三十七年以委署前鋒參領從副都統齊里克齊征金川三十八年升副護軍參領三十九年二月升前鋒參領七月官軍攻穆谷舒亮伏軍山下待賊殲賊甚多又進攻卡卡角賊匿兵山溝舒亮先於密箐中望見火光以火器就擊之賊潰敗奏入賜緞二疋以功加副都統銜隨授鑲白旗滿洲副都統十二月

調補荊州副都統四十一年二月再調鑲黃旗滿洲副都統又以克噶拉依功

賜穆騰額巴圖魯名號六月授管理健銳營大臣金川凱旋圖形紫光閣

御製贊曰率健銳營訓練有素節制之師五步六步礮礮叢中鼓勇身先勞而不伐是用稱賢四十二年補鑲藍旗護軍統領四十六年五月大學士阿桂勦撒拉爾逆回蘇四十三舒亮從至卽敗賊於華林山賊懼掘濠設卡以自固閏五月阿桂督領隊大臣海蘭察由山西橫衝賊卡舒亮從山南進當賊峯賊蠡出抗拒箭射舒亮傷左肘拔箭裹瘡而戰奪賊卡四座斃賊百餘得

旨優獎並

賞大小荷包銀百兩六月與海蘭察乘賊不備以土袋填賊濠渡軍擊之守濠之賊翦馘迨盡復奪十餘卡賊首蘇四十三爲我兵所戮舒亮勦華林寺餘匪事平回京供職四十八年調正黃旗護軍統領五十二年林爽文叛擾臺灣七月舒亮與領侍



衛內大臣海蘭察護軍統領普爾普並授領隊大臣從協辦大學士陝甘總督福康安渡江征之爽文圍諸羅久福康安議官軍至後卽取路笨港救諸羅舒亮由烏日莊夾攻以分賊勢十二月賊方踞北大肚山拒我舒亮迎擊之連破南大肚王田莊瀨湑莊以至半山莊坑子莊遂達烏日莊賊巢下得

旨從優議敘五十三年二月爽文逃入內山匿東勢角福康安督舒亮及成都將軍鄂輝由歸仔頭逼之至麻著社分軍鄂輝由樸仔離東山路進舒亮直取東勢角山徑峻險諸將皆步上殺賊二千餘名獲軍械無算爽文窘甚復走至老衢崎舒亮督軍急進獲之奏入

諭曰此次臺灣逆匪滋事至一年之久福康安等帶兵渡洋旬日之間卽將逆匪痛加殲戮搗穴擒渠各村莊得以安堵如舊該處地隔重洋五方雜處風俗素稱刁悍經此一番懲創若不明示武威恐民人等事過卽忘不足令其怵目儆心常思安分畏法將來事竣後如福康安海蘭察及鄂輝普爾普舒亮之勇略最著者應于臺灣郡城及嘉義縣兩處共建生祠塑立像貌

俾該處民人望而生惕日久不忘舒亮隨爽文並各賊目入京  
賊黨賴大病困舒亮在途誅之以六百里奏

聞奉

旨申飭時已授爲鑲紅旗蒙古都統

命仍回正黃旗護軍統領任四月敘功給雲騎尉世職再圖形  
紫光閣

御製贊曰金川之役已爲領隊事定功成統軍歸內搜捕逸賊  
不遺醜輩生致逆渠其能不昧冬調鑲黃旗護軍統領五十五  
年擢荊州將軍五十八年調黑龍江將軍六十年坐私買貂皮  
革任並革世職會川陝楚邪匪滋事叛據當陽縣

命以三等侍衛赴軍營自効嘉慶元年三月總督畢沅次當陽  
舒亮統河南兵至襄陽策應先擊斬賊目孫應元等再戰劉家  
集擒賊目朱正英陞二等侍衛四月會軍圍當陽乘賊困憊開  
西門一面縱之走舒亮自北擊之殺賊目熊道成等三名擒賊  
目張仲選等六人是月擢頭等侍衛五月舒亮由東門缺口登  
城賊目王正統執白旗指揮迎敵擊以火鎗立斃舒亮左額亦

受鎗傷進戰不已毀賊所築墻礮臺進占東門賊退守西北門  
依龜背山爲窟穴官軍乘勝直進賊易服將遁官軍四面蹙之  
凡斬馘生擒一千餘獲賊首陳德本遂復當陽奉  
旨加副都統銜

賞戴花翎並有玉搬指大小荷包之

賜尋授鑲藍旗漢軍副都統

命赴鍾祥協同總統永保辦賊九月鍾祥賊分東西路竄唐縣  
鄧州舒亮伏軍呂堰驛待之賊至伏發西竄之賊殲焉乃合兵  
追賊之東竄者十月有草店之捷舒亮爲鎗所中

賞銀絲盒大小荷包獎勵之十一月賊偵知官軍在蕭家岡乃  
詭稱難民渡滾河逸去舒亮坐堵禦不力革去花翎及巴圖魯  
名號

命總督惠齡訊問參奏二年正月敗賊于興隆店又敗之于都  
司街及吳家店

賞鑲玉如意一次大小荷包二次適惠齡以帶兵需人請

命留營効力二月屢敗賊于劉家港小阜街曾家店

賞銀絲盒一金盒大小荷包各二三月統軍至河南張博士店鎮遏賊勢四月移駐李官橋五月以賊渡漢江降爲三品頂戴留副都統任三年二月復坐勦白巖山賊不力總督勒保劾奏請褫職治罪奉

旨舒亮官職全行黜革作爲兵丁留營効力贖罪尋卒于軍

阿必達原名阿彌達正白旗滿洲人大學士阿桂第三子乾隆三十三年十月由官學生授藍翎侍衛三十五年阿桂隨經略傅恒征緬匪傅恒既還京

上命阿桂辦理撤兵事宜三月

上以阿桂辦理忽遽爲敵所輕革退阿彌達及阿桂長子三等侍衛阿廸斯官事詳阿桂傳三十六年五月阿桂以辦理軍務不善革職

諭曰阿桂辦理雲南軍務毫無端緒將伊治罪之處已另降諭旨矣若止罪坐一人不足蔽辜其子阿廸斯著發遣廣西右江鎮阿彌達著發遣廣東雷瓊鎮交該部於本日卽行發遣三十七年二月阿桂隨將軍溫福征金川屢克各險要

恩旨以阿桂爲參贊大臣阿彌達及阿廸斯俱寬免回京三十八年十一月授三等侍衛在乾清門行走四十年八月阿桂以定西將軍克金川勒烏圍賊巢

上命阿彌達齎紅寶石帽頂馳赴軍營宣賜四十一年正月擢二等侍衛四十七年二月奉

旨乾清門侍衛阿彌達着馳驛赴西寧祭告河神七月回京復命

諭曰今年春間豫省青龍崗漫口合龍未就遣大學士阿桂之子乾清門侍衛阿彌達前往青海務窮河源告祭河神事竣復命並據按定南針繪圖具說呈覽據奏星宿海西南有一河名阿勒坦郭勒蒙古語阿勒坦卽黃金郭勒卽河也此河實係黃河上源其水色黃廻旋三百餘里穿入星宿海自此合流至貴德堡水色全黃始名黃河又阿勒坦郭勒之西有巨石高數丈名阿勒坦噶達素齊老蒙古語噶達素北極星也齊老石也其崖壁黃赤色壁上爲天池池中流泉噴涌醜爲百道皆作金色入阿勒坦郭勒則眞黃河之上源也其所奏河源頗爲明晰所

有兩漢迄今自正史以及各家河源辨證諸書允宜通行校閱訂是正訛編輯河源紀略一書以昭傳信四十八年二月擢頭等侍衛兼尙茶正四月授上駟院卿四十九年授正藍旗滿洲副都統九月兼公中佐領五十年九月

諭曰前命館臣編輯河源紀略錄入四庫全書以昭傳信近偶閱河防一書卷首冠以河圖所載源流方向山川形勢與阿彌達所奏相符此圖爲張靄生所著其書則採述陳橫議河之說從來疑信參半歷數百年今始考詢明確而張靄生之圖在數十年之前適與今圖吻合著將河防述言一書錄入四庫全書附於靳輔治河奏績一書之後五十一年九月遷工部右侍郎五十四年三月奉

旨阿彌達改名阿必達五十六年正月

諭曰阿必達久病未痊工部侍郎著開缺仍留副都統在御前侍衛上行走五月卒子那彥寶襲一等輕車都尉兼雲騎尉現官刑部左侍郎正藍旗滿洲副都統總管內務府大臣

玉德瓜爾佳氏正紅旗滿洲人乾隆三十三年由官學生考補

內閣中書三十七年遷侍讀三十九年授湖南衡州府知府四  
十一年遷岳常澧道四十二年九月丁憂回旗在刑部郎中上  
行走四十四年二月

命署山東濟東泰武道俟服闋實授四十五年因前在岳常澧  
道任內失察沈大綬刊刻書籍狂謬降二級調用仍在刑部行  
走四十八年署員外郎四十九年升郎中五十一年擢山東按  
察使五十二年調安徽按察使五十四年六月遷布政使十月  
擢刑部右侍郎

命赴湖北鞫濟陽縣民楊隆霖控案五十六年赴奉天錦州遼  
陽州各處查辦控案五十七年轉左侍郎迭赴直隸河間及江  
西浙江查辦控案六十年正月授山東巡撫

賞戴花翎二月拏獲劉之協同教案犯陶興

諭曰玉德到任未幾卽能飭屬拏獲邪教案犯足見留心著賞  
給大荷包一對小荷包四個五月以二麥歉收未將缺雨情形  
具奏

諭曰山東與直隸接壤本年直隸麥收已足九分而山東僅六

分有餘自因該省春間雨雪本未普霑入夏以來雨澤又復短少是以麥收分數較爲歉薄玉德身任巡撫于地方民事漫不經心並不將缺雨之處預行奏聞酌籌接濟甚屬非是現據該撫將各社倉穀出借以濟民食若再不盡心經理任聽屬員浮冒實惠不能及民則係該撫自取重戾不能仰邀寬宥也七月疏稱與兩江總督蘇凌阿札商擒捕洋盜事宜倘有賊船北竄追至鄰境卽以兩礮爲號鄰省兵船聞號礮之聲亦放兩礮接應

諭曰盜船在洋面駕駛正當不露聲息設法誘之使前以便悉數擒捕若甫經望見盜船相隔尙遠輒先施放鎗礮豈非使賊聞風逃逸此最爲水師惡習昨已降旨通飭若云恐賊竄逸祇須嚴飭官兵常于洋面梭織巡查並勤加瞭望亦無難彼此會合設法兜擒十月疏稱東省水師營額設戰船十二隻體式笨重未能如商船之便捷臣前赴登萊海口目覩情形與鎮臣許世臣奏明添僱商船巡緝因思僱船多費不若將應修營船改造商船式樣俾資駕駛而收實效下部議行十二月署河東河



道總督嘉慶元年正月疏稱山東糧價平減採買穀米已足復發銀增買以裕倉儲

上飭其所辦非是

諭曰玉德卽欲買倉穀亦祇須按照額數量爲採辦乃于各屬買足之外復行增買必致民間糧石因地方官採買過多漸形短絀糧價轉就騰貴是未必實於倉儲有益而小民先受其累看來竟係該撫聽信屬員之言率于額外添買以爲藉端勒派侵肥地步除現在應行買補缺穀業已足額外其餘加買者不必辦理以期民食無礙六月調浙江巡撫二年二月疏稱洋面捕盜兵船設有旗幟篷帆寫有字號賊匪望見兵船卽先行逃竄今擬撥兵船十隻假寫商船字號誘賊來劫並將各營小船形式與漁艇相似者每營撥出十一隻每船派兵十名充作漁戶遇盜匪卽著一船報信十船隨行鎗礮齊發可期人船並獲諭曰所辦具見留心該撫惟當督飭所屬實力妥辦以期設法誘擒肅清洋面六月疏劾宣平縣知縣張蚤譽霉沓倉穀

上以參奏遲延降

旨詢問八月覆奏因該縣交代時春雨連綿不能即時盤量致逾兩月又因宣平縣距省較遠經兩司駁明始行揭參

諭曰此案該縣係二月初二日交印卸事該撫于六月二十九日始行參奏遲至四月有餘是該撫既經遲誤于前又復支飾于後實屬非是玉德著交部議處部議革職奉

旨從寬免其革任著罰交養廉三年以示薄懲四年正月恩旨免繳養廉銀五千兩七月

命赴江蘇審辦巡撫宜興被參各款及地方官濫責生員案十月署閩浙總督五年正月實授六月疏稱查辦漳泉械鬪情形親抵泉州出示曉諭俱各紛紛呈繳器械約束子弟永不械鬪出俱甘結並送匪徒經官嚴懲人人稱快又洋面艇匪往北竄逸卽擬分配兵船選派將弁親往擒捕

上嘉之六年正月署福州將軍五月奏請各鎮總兵分年輪班

入

觀

諭曰所奏甚是各省文武大員三年奏請陛見一次固屬定例

但必須本任現無應辦緊要事件方可循例來京亦無一省提鎮大員同時奏請之理著照玉德所奏不必拘定陛見年分亦不必限以年底總視各鎮現無應辦要務者每年酌令輪替來京展覲十一月參奏提督李長庚氣粗心浮於提調官兵統轄全省水師之任未能負荷

上以其與兩次密陳考語自相矛盾嚴飭之七年五月疏稱營伍操演鎗箭請除去鎗上所釘星斗射靶俱改用梅鍼箭

諭曰所奏大屬紕繆施放鳥鎗全憑鎗上所釘星斗爲準若平素演習精熟自能便捷命中今玉德因閩浙營兵放鎗遲慢手顫欲將星斗除去殊不思兵丁等執鎗手顫自因演習生疎所致應即將該兵丁等責懲豈除去星斗卽不手顫乎至所稱軍營用箭皆係梅鍼操演布靶應改用梅鍼箭亦不成話箭枝式樣種種不同隨地異宜總在發矢有準如果將鏹前演習純熟卽易用梅鍼必能一律命中若平日操演必須改用梅鍼方能射賊則樹候設正亦非臨陣時所用豈有以人爲的竟將應死罪囚試演射藝之理真所謂無知瞽說矣我朝武備整齊弓矢

鎗礮最爲軍營利器法制精良世守不易乃玉德輒思改變舊章此奏若出提鎮漢員內已屬不經況玉德係滿洲總督竟於本朝武備懵然不知率議更張尤爲謬妄玉德著拔去花翎傳旨嚴行申飭仍交部議處部議革任

詔從寬留任八年二月因平定三省邪匪

推恩內外臣工玉德降級留任各案均

予開復十二月江西石城匪徒滋事毗連閩界

上命玉德馳往建寧一帶查辦九年正月拏獲首犯吳韜寧金鰲及聽糾滋之匪犯溫正順等十餘名地方寧謐

賞還花翎十年十二月廈門行商以洋匪蔡牽乘間肆劫呈請捐造巡船二十隻添募兵丁八百名各行商每年公捐番銀四萬圓以爲兵丁月餉出洋口糧及燂洗船隻修換篷索之費玉德偕巡撫李殿圖以

聞並請將兵丁所用火藥鉛丸令各商繳價還營

諭曰該商等捐造巡船藉資保護其事尙屬可行卽燂洗船隻更換篷索捐資修整亦無不可至添設兵丁所用火藥鉛丸令

各商繳價還營則實不成政體國家設兵衛民豈有以歲支糧餉例用藥鉛取資商捐之理玉德李殿圖均著傳旨申飭是月蔡逆犯臺灣由鹿耳門竄入勾結鳳山嘉義陸路匪徒滋擾

上命將軍賽沖阿會同玉德及提督李長庚辦理十一年二月上以玉德紮駐廈門安坐數月毫無籌畫降二品頂戴拔去花翎三月李長庚率水師勦敗匪船賽沖阿渡臺掃清陸路蔡牽仍乘間由鹿耳門竄出玉德自請革職治罪

諭曰玉德任總督有年並不整頓水師認真緝捕其養癰貽患之罪已無可寬迨蔡牽逆犯滋擾臺郡既不能渡洋親往又不多派官兵寬備糧餉種種貽誤此時應行革職治罪之處何待奏請但現在軍需緊要若遽將伊交部治罪轉得置身局外著先行革去頂戴仍將現在軍需責令經理五月因患病請假調理並奏言拏獲蔡牽逆犯洪教等供稱蔡牽幫船原有八九十隻被官兵節次攻燬僅剩大小船三十餘隻前在臺灣時蔡牽每船給火藥一二百斤自臺竄回後每船給火藥三四十斤其米糧係隨時打劫商船所得

諭曰玉德于海疆事務不能隨時整頓以致洋盜蔡牽竟敢勾結陸路匪徒竄赴臺灣滋擾此皆由該督平素因循貽誤咎無可辭卽據該督此次所訊賊供蔡逆原有幫船八九十隻每船給發火藥一二百斤統計已不下一萬數千斤試思盜船火藥至如許之多豈在洋面所能猝辦前蔡牽竄擾臺灣時玉德因局存火藥不敷撥用曾咨江西巡撫備辦協濟是官署火藥較少而盜匪轉多有積存若非內地奸民私運接濟卽係營汛不肖弁兵牟利營私可見沿海一帶非特視詰奸爲具文竟以通盜濟匪爲常事總督統轄文武所司何事乃玩誤一至于此今該督復以肝氣病發請賞假一月調理玉德卽著革職回旗調理俟病痊之日再降諭旨是月李長庚參奏前年札商玉德兵船低小情願借廉捐造大船玉德以爲有需時日窒礙難行又蔡牽在鹿耳門竄出時篷索破爛火藥缺乏現回內地在水澳大金地方裝篷燂洗盜船無一非新火藥無不充足諭曰玉德于李長庚札商時任意駁飭賊船回至水澳大金地方卽能裝換新篷火藥充足可見該處必有奸民及不肖弁兵

等平日積慣通盜此亦玉德廢弛貽誤之罪

命逮赴刑部審訊治罪並

諭福州將軍楊春密查玉德聲名歎蹟九月楊春覆奏玉德在廈門公館時每日需用洋銀二百八十圓其家人等每日每人需用洋銀二十圓玉德先在蘇州開有當舖今知事將敗露潛遣人赴蘇將當舖售賣又在廈門造免死金牌欲招致洋盜朱濱

上令留京王大臣親赴刑部監提玉德詳悉研究尋訊明玉德勒索供應一節並無其事蘇州開當舖一節僅止寄存玉器銀兩委無合夥之事惟誤聽人言往招賊首朱濱並打造金牌旋經銷燬及辦理洋盜事務種種廢弛錯謬應請發往伊犁効力贖罪奉

旨依議十二年十月

賞給三等侍衛作爲烏什辦事大臣十三年四月因病

恩准回旗調理十二月卒子斌良江南候補道桂良禮部員外郎岳良理藩院員外郎徵良大理寺司務法良候補筆帖式

黃文燦鑲紅旗漢軍人大學士黃廷桂之曾孫乾隆三十三年由官學生承襲三等忠勤伯三十六年授三等侍衛三十九年兼公中佐領四十年二月擢散秩大臣五月授鑲白旗漢軍副都統嘉慶元年授廣東鎮守廣州副都統

賞戴花翎二年偕總督吉慶巡撫陳大文等疏言廣東駐防兵丁滿洲八旗向蒙

恩給養育錢糧惟漢軍未定此例原應各旗孤寡無多該旗官兵于月餉內勻攤周恤尙易爲力今駐防年久生齒日繁若不籌款調劑于官兵生計有關查糧道衙門普濟堂經費遞年所收佃租商息放關分頭四款除普濟堂支銷外每年餘銀八九千兩至一萬餘兩現積存道庫銀十四萬六千餘兩竊計此項本屬

惠養孤貧今漢軍八旗孤寡卽于此款經費內每名月給銀一兩以資養贍得

旨照所請行七年惠州博羅縣會匪陳爛屐四等滋事總督吉慶咨調翼尉佐領各一員雲騎職銜章京二員前往勦辦文燦



偕將軍書敬副都統善保護省城

上諭惠州距省祇三百餘里書敬善保黃文燦聞國家有此匪徒滋事且現管數千八旗官兵理宜奏往會同總督速爲勦辦乃藉稱護守省城殊屬不曉事體除傳旨申飭外仍着明白回奏尋書敬奏請議處文燦以未奏部議降三級調用

詔改爲革職留任八年二月得

旨黃文燦人本平庸不勝副都統之任著回京在散秩大臣上行走是年十一月授鑲藍旗漢軍副都統十二月

命署熱河副都統九年正月卒于任子瑞保襲三等忠勤伯

額勒伯克蒙古正白旗人卓特氏由前鋒于乾隆三十三年授前鋒校三十五年補委署烏鎗護軍參領三十七年授烏鎗副護參領三十八年遷烏鎗護軍參領尋隨征金川四十年八月官兵渡河而東取路至扎烏古山梁對面復渡而西額勒伯克等分隊攻克丹扎木各賊寨殲戮無算閏十月率兵分路攻扎烏古山腰破其三碉四卡矢石斃賊甚多扎烏古者河西門戶賊守禦至嚴至是已爲我兵所得乘勝進抵斯底葉安地周圍

可二十里額勒伯克等奮勇追勦賊又喪膽奔潰攻破寨落三十餘處遂進兵至日斯滿之南地名耳得谷深溝密箐賊于山上結兩大寨前後周設礮卡以自衛額勒伯克將兵一鼓直前突圍而入斃賊目錫拉木并殲賊番五十餘人無得脫者副將軍明亮以

聞奉

旨賞給甲圖布巴圖魯名號十一月領兵取阿爾古先克其山半大卡四座卽奮力下壓賊寨痛加勦戮拋入火彈煙焰蔽天遂克阿爾古十二月官軍分道攻達撒谷額勒伯克等分隊設伏其西面兵丁鼓銳直搗礮門額勒伯克等卽由達撒谷而東取斜坡上木城二座奏入

諭咨部議敍又進攻獨古木思滿其地與獨古木思得毗連均爲兩當險隘額勒伯克等以兵克之復將布吉魯及達那兩道山梁同時攻獲殲賊百餘人奪得鐵礮一位旋奉

閣諭交部優敍四十一年大軍凱還圖繪後五十功臣像于紫光

命詞臣爲額勒伯克贊曰曰甲圖布是云百勝用命獻功實與名稱乃復帶兵直登山頂連克要隘厥志斯逞四十五年授掌關防營總四十六年升獨石口副將四十七年丁母憂回旗屆百日引

見奉

旨暫在頭等侍衛上行走五十年授阿勒楚喀都統五十四年調三姓副都統嘉慶二年擢黑龍江將軍三年卒子多隆武現任直隸副將

惠倫鑲黃旗滿洲富察氏一等承恩公加

賞一等男奎林子出繼伯父一等誠嘉毅勇公明瑞爲嗣乾隆三十三年由閑散襲世爵四十三年授三等侍衛五十五年擢御前一等侍衛尙茶正五十九年授鑲藍旗護軍統領六十年擢奉宸院卿嘉慶二年邪匪滋事

命偕副都統阿哈保率吉林索倫兵三千並東三省預備進哨兵百餘名赴楚會剿

諭曰川匪擾至湖北南漳邊界明亮德楞泰一時不能趕赴需

兵甚急着惠倫卽迅往襄陽一帶訪詢如明亮等已繞至賊前卽可隨同擊勦倘明亮等猶在賊後追逐惠倫等卽會同王文雄帶領官兵堵禦攻圍又

諭曰帶領東三省之惠倫等以之領兵則有餘以之調度則不足著俱聽景安調度以期事權歸一八月官兵追賊至襄陽小河口會日暮賊思北竄惠倫隨景安率兵至遏其衝賊首尾不能相顧向西南而奔惠倫與阿哈保分投抄截追殺二十餘里殲賊五百餘生擒數十俄大兵自荊門宜城星夜進勦惠倫等乘機夾擊賊大敗逸入南漳山中奏入奉

旨嘉獎並

賞玉搬指大小荷包十二日參贊德楞泰聞賊由石廟等處北走恐其直渡襄樊同惠倫等於耗子溝禦之遇賊六七千人向前直撲德楞泰于惠倫等兵列山壩時提督達音泰射斃二賊賊稍却惠倫遂率兵下壓會都統明亮等自楓樹壩追擊夾攻惠倫等衝進賊隊賊勢披靡斬獲甚多賊又竄花石嶺明亮德楞泰令總兵長春誘賊下山達音泰設伏山腰惠倫亦受檄率

馬隊兵俟伏起分投攪殺是役斃賊五百餘二十九日賊竄至黃龍灘欲北犯鄖郡西擾斗河以防守嚴無船可渡復折回我兵遇于草甸賊馬步五路蜂至我兵亦分爲五隊惠倫等由山麓大路進擊時明亮德楞泰已佔山包賊忽於溝內抄出上撲營卡被我兵殲戮無算賊敗退別有賊突出接應惠倫等奮勇衝擊賊忘命奔逸竄往陳家山梁惠倫等渡湖追勦賊乘山霧迷漫翻山圖遁惠倫見有賊執旗指揮知爲首逆馳追至長坪射之應弦而倒餘賊競集惠倫復射斃數人猝中鎗歿於陣事聞

諭曰惠倫前經派往軍營打仗殺賊頗爲奮勇茲在長坪地方勦捕因射賊墮馬正欲趕擒忽中賊鎗陣亡惠倫係奎林之子繼與明瑞爲嗣明瑞從前亦係陣亡父子効命疆場實爲可憫著交部從優議卹仍由廣儲司賞銀三千兩給伊家屬辦理喪事其應襲公爵卽著伊子博啟圖承襲俟百日服闋著御前侍衛上行走以示朕軫卹蓋臣之意尋議恩賞騎都尉加一雲騎尉子一等博啟圖兼襲授鑾儀使

御前侍衛上行走八月因所管之請轎校尉行走脫肩奉  
旨退出御前侍衛在乾清門行走兼正紅旗漢軍副都統

卷三十三

滿漢大臣列傳

卷三十四

和 坤

盛 住

宗室額勒亨額

觀 祥

永 寧

和坤正紅旗滿洲人鈕祜祿氏以文生員於乾隆三十四年十月承襲三等輕車都尉三十七年十一月授三等侍衛旋挑補粘竿處侍衛四十年閏十月遷乾清門侍衛十一月擢御前侍衛授正藍旗滿洲副都統四十一年正月授戶部右侍郎三月在軍機大臣上行走四月授總管內務府大臣八月調鑲黃旗滿洲副都統十一月充國史館副總裁

賞戴一品朝冠十二月總管內務府三旗官兵事務

賜紫禁城騎馬四十二年六月轉左侍郎十月兼任步軍統領四十四年正月吏部尚書永貴等奏京察降革司員參罰事件免其隨帶和坤以扶同瞻狗降二級留任旋監督崇文門稅務總理行營事務四十四年八月命在御前大臣上學習行走四十五年正月

命偕刑部侍郎喀寧阿赴雲南查訊按察使海寧控告總督李侍堯貪營各款鞫得實並奏滇省自李侍堯婪索屬員贓私狼籍吏治廢壞各府州縣多有虧空須徹底詳查清釐積弊上以福康安爲雲貴總督到任再行查辦和坤於定讞後回京未至擢戶部尙書旋

命在議政大臣處行走五月到京復

命奏雲南永昌府之潞江普洱之磨黑兩地向立稅口禁攜帶絲紙針綢出隘但關外向有騰越龍陵思茅諸處地闊民繁難免偷漏請改設以收實效又奏滇省鹽務緣川省私鹽偷漏味好而價廉致官鹽難銷正課日虧宜在川滇交界處實力禁止並以滇省私錢盛行官銅缺少請設法整頓皆奉

旨飭行又奏緬甸送還蘇爾相等有同來緬子二人尙羈禁永昌似應釋回雲南開化府屬設立關口內地民人往交趾貿易者由藩司給以印票前交趾黃文桐滋事內地民人不從俱逃回經李侍堯拏獲有發遣者有因曾在彼處娶妻定擬死罪者聞粵省關隘亦有通交趾之處辦法又復不同似覺兩岐



上諭福康安將二緬子釋歸其逃回人犯改擬具奏尋實授御前大臣補鑲藍旗滿洲都統

諭曰尙書和坤之子賜名豐伸殷德指爲十公主之額駙待年及歲時舉行指婚禮六月授正白旗領侍衛內大臣請以內務府筆帖式歸八旗應考

上不許十月充四庫館正總裁兼辦理藩院尙書事四十六年四月甘肅撒拉爾番回蘇四十三等滋事進逼蘭州

上命額駙拉旺多爾濟領侍衛內大臣海蘭察護軍統領額森特等率兵討之和坤帶

欽差大臣關防同往又

命大學士阿桂督師旋以阿桂有痒疾

勅和坤兼程先進督辦一切和坤至蘭州訶賊勢方踞八蜡廟雷壇等處掘濠自固因奏言分兵四路令海蘭察等從山梁進勦額森特等于了口斜撲賊營提督仁和等直攻八蜡廟大樓和坤自偕西安將軍伍彌泰等由龍尾山梁爲策應時海蘭察已逼賊至山梁殲其溝中伏匪和坤率弁兵乘勢追逐斬二百

餘人賊立坎深數丈小道皆掘斷不能度遂撤兵回是役也總兵圖欽保陣亡和坤匿不奏後請

恩卹始及之

上以其取巧傳旨申飭又

諭曰和坤在途次所奉諭旨甚多均未奏及豈不知朕于數千里外懸懸厪注乎再本日畢沅奏和坤在途行走情形婉轉開脫措詞委曲此卽外省觀望習氣究于和坤之行走濡滯能逃朕之洞鑒乎和坤之未至蘭州也海蘭察額森特先馳至擊勝之和坤乃以二人不查賊形希僥倖責數之並奏其欺誑

上曰伊二人先行打仗並無不是之處和坤遽形之章豈行走遲延者反爲有功乎若令朕顛倒是非申飭無過之人朕不爲也又以總督勒爾謹養癰貽患不卽參劾彙奏下部議降三級留任五月

諭曰和坤于四月十七日始抵蘭州而阿桂亦於四月二十一日續到所有籌辦諸事雖皆聯銜入告而自阿桂到後經畫措置始有條理此事阿桂一人已能經理妥協無須復令和坤同

辦且恐和坤在彼事不歸一即海蘭察額森特等向隨阿桂領兵打仗阿桂之派調伊等自較和坤呼應更靈而朕啟鑿熱河爲期亦近御前領侍衛內大臣軍機大臣等扈蹕者亦無多和坤令速行馳驛回京尋到京復

命奏陝西毗連四省形勢扼要而駐防兵單甘肅兵數以移駐新疆未經補額存營者亦少皆須多爲添駐又奏請西安提督仍復舊制駐固原州而以固原鎮總兵移駐河州其河州協副將改于安定或會寧駐劄方足以資控馭

詔下阿桂等行之十一月兼署兵部尙書十二月管理戶部三庫四十七年二月以軍機大臣審辦甘肅鎮廸道巴彥岱受賄狗隱事擬罪輕縱降三級留任四月御史錢澧劾山東巡撫國泰布政司于易簡貪縱營私

命偕左都御史劉墉按訊既定讞

命先回京八月加太子太保十月充經筵講官四十八年六月賞戴雙眼花翎十月充國史館正總裁十一月充文淵閣提舉閣事四十九年三月調補正白旗滿洲都統四月充清字經館

總裁七月甘肅石峯堡逆回張文慶等平以和坤首承

諭旨再予輕車都尉世職歸併前職照例議襲旋調吏部尙書協辦大學士兼管戶部九月仍以平回匪功議敘封一等男五

十一年六月御史曹錫寶奏和坤家人劉全服用奢侈器具完美恐有借端撞索情事應密行偵訪嚴加懲創

上命王大臣會同都察院查核又意其欲劾和坤而不敢明言故以家人爲由隱約其詞爲將來波及地步復

諭曰此案總期根究明白並非因此一虛言欲治和坤罪更非欲爲和坤開脫留京王大臣等不可誤會朕旨將曹錫寶加以詞色有意吹求使原告轉成被告亦無是理務須平心靜氣虛衷詳問如曹錫寶果能指出欸蹟訪查得實卽一面從嚴審辦一面據實具奏不可因和坤稍存迴護若稍存迴護是乃陷和坤且自陷也繼復

諭詳詢曹錫寶如果和坤有營私舞弊蹟不妨據實指出朕必質訊明確將和坤治罪旣而王大臣等奏曹錫寶如有實據自應列欸參奏今以無根之言冀博建白之名請交部議處旋議

降二級調用

上以其言官改爲革職留任閏七月和珅授文華殿大學士仍兼吏部戶部事九月

諭曰和珅於乾隆四十三年兼管崇文門監督迄今已有八載現係大學士亦不便兼理權務前曹錫寶參奏和珅家人一事未必非因此遂退去監督事又

諭曰昨召見新放廣信府知府湛露年紀尙輕詢以清語亦屬生疎難膺方面之任且伊係福長安之妻弟和珅于京察時將該員保送一等不無瞻徇之意殊屬非是和珅交都察院議處旋議降二級留任十月兩廣總督富勒渾縱容家人殷士俊等關通婪索事露

諭曰富勒渾操守平常密諭孫士毅據實查奏時和珅卽在朕前奏稱不如將富勒渾調回徐行查察可不致遽興大獄是和珅未免意存消弭爲迴護富勒渾地步五十二年奏京師米價昂貴各舖戶囤積居奇請嗣後飭禁毋得過五十石尋商人呈遞公狀未卽遵禁定郡王綿恩釋弗究

諭曰和坤以京城米價昂貴出示禁止囤積而商人惟利是圖糧價仍未平減因查出各舖戶囤積米麥六萬餘石奏請交廠減價糶賣其應如何立廠派員稽查及作何減價平糶之處和坤並未酌定章程聲敍明晰已屬非是乃留京王大臣及綿恩所奏似以此事于商民均有未便辦理諸多掣肘又含糊其詞竟若因和坤原辦之人爲之遷就彌縫委曲完事而言外以朕亦未免有迴護原辦之意有是理乎總之此事非迴護和坤竟是害和坤矣五十三年二月臺灣逆匪林爽文平和坤以承書諭旨晉封三等忠襄伯並

賞用紫韁時繪二十功臣於紫光閣和坤與焉

御製贊云承訓書諭兼通清漢旁午軍書惟明且斷平撒拉爾亦曾督戰賜爵勵忠竟成國幹五十四年四月充殿試讀卷官五月充教習庶吉士十五年正月

諭曰大學士和坤著加恩賞給黃帶四開襖袍固倫額駙豐伸殷德著兼散秩大臣行走四月充殿試讀卷官十一月以總辦萬壽慶典和坤同金簡專司其事

命於所加二級外再加一級五十六年四月審訊護軍海旺等竊庫銀一案諸前銓統領參領官俱獲咎和坤以管庫大臣既經失察擬罪又失之寬縱

上責令照數賠補仍交部議處旋議降一級抵銷十一月刻石經於辟雍

命爲總裁五十七年九月廓爾喀平圖十五功臣像和坤以承書

諭旨辦理秩如再圖形紫光閣

御製贊曰國家用武帷幄絲綸事殊四朝清文漢文蒙古西番頗通大義勤勞書旨允稱能事並

恩予議敘軍功加三級十月兼翰林院掌院學士充日講起居注官五十八年充教習庶吉士兼管太醫院及御藥房事務五十九年二月吉林人參闕庫額

命軍機大臣繕寫飭諭和坤瞻顧遷延未卽擬

旨

上責之降二級留任七月奏八旗立廐養馬原以備扈從行營

之用但常時易致折騰請分給各旗官員拴養調習壯健較爲得力空出馬圈地蓋造房間給與窮苦兵丁居住

詔議行六十年四月充殿試讀卷官五月充教習庶吉士九月朝審停勾

命查明其情最重者請

旨裁定而刑部理藩院于蒙古台吉圖巴扎布兇殘一案未先具奏俱干嚴議和坤以管理理藩院又軍機書

旨始終迴護降三級留任十月廷試武舉發策命軍機大臣恭查

實錄

實錄例不載武試題和坤等率以文武試策總載

實錄對

覆詢對如前

上以護過飾非嚴飭之革職留任先是京察屆期和坤屢邀議敘是年

特命停罷嘉慶元年正月調正黃旗領侍衛內大臣六月調鑲



黃旗滿洲都統二年兼理刑部退去戶部事旋以軍需報銷仍兼理戶部三年邪匪王三槐就擒和坤以襄贊機宜晉公爵四年正月三日

高宗純皇帝升遐

今上皇帝令和坤總理喪儀科道諸臣以和坤不法事列欵參奏

上命王大臣公同鞫訊俱得實

上乃諭曰和坤受

大行太上皇帝特恩由侍衛洊擢至大學士在軍機處行走多年叨沐

殊施諸臣無其比朕親承

付託之重茲猝遭

皇考大故每思論語三年無改之義如我

皇考敬

天法

祖勤政愛民實心實政方將垂示萬年永爲

家法何止三年無改至

皇考所簡用重臣朕斷不肯輕爲更易卽獲罪者稍有可原猶未嘗不思保全今和坤情罪重大實有難以刻貸者設數年來廷臣中有能及早參奏必蒙

聖斷立置重典而竟無一人奏及者內外諸臣日以

皇考聖壽日高不敢煩勞

聖心實則畏懼和坤箝口結舌皆朕所深知今和坤罪狀已著其得罪我

皇考之處擢髮難數亦百喙難辭朕若置之不辦何以仰對

在天之靈除在京王大臣會審定擬外著通諭各督撫將和坤如何擬罪並此外有何欺跡據實覆奏旋據直隸總督胡季堂奏和坤種種悖逆不法蠹國病民貪黷放蕩目無

君上請以大逆論上紓

太上皇帝在天之憤怒下快天下人心之積恨並查出和坤薊

州墳塋僭妄踰制

上乃申諭曰昨于乾隆六十年九月初三日蒙

皇考册封皇太子尙未宣布

諭旨而和珅于初二日在朕前先遞如意洩漏機密居然以擁戴爲功其大罪一上年正月

皇考於圓明園召見和珅伊竟騎馬直進左門過正大光明殿至壽山口無父無君莫此爲甚其大罪二又因腿疾乘坐椅轎擡入大內肩輿出入神武門衆目共睹毫無忌憚其大罪三並將出宮女子取爲次妻罔顧廉恥其大罪四自勦辦川楚教匪以來

皇考盼望軍書刻縈宵旰乃和珅于各路軍營遞到奏報任意延擱有心欺蔽以致軍務日久未竣其大罪五

皇考聖躬不豫時和珅毫無憂戚每進見後出向外廷人員談笑如常其大罪六

皇考力疾披章批諭字畫間有未眞和珅膽敢口稱不如撕去另行擬旨其大罪七前奉

皇考敕旨令伊管吏部刑部事務嗣因軍需銷算伊係熟手是以又

諭令兼理戶部題奏報銷事件伊竟將戶部事務一人把持變  
更成例不許部臣參議一字其大罪八上年十二月奎舒奏循  
化貴德二廳賊番聚衆在青海肆劫和珅竟將原摺駁回隱匿  
不辦全不以邊務爲事其大罪九

皇考升遐後朕諭蒙古王公未出痘者不必來京和珅不遵諭  
旨令已未出痘者俱不必來全不顧撫綏外藩之意其居心實  
不可問其大罪十大學士蘇凌阿兩耳重聽衰邁難堪因係伊  
弟姻親竟隱匿不奏侍郎吳省蘭李潢太僕寺卿李光雲曾在  
伊家教讀保列卿階兼任學政其大罪十一軍機處記名人員  
和珅任意撤去種種專擅不可枚舉其大罪十二昨將和珅家  
產查抄所蓋楠木房屋僭侈踰制其多寶閣榻段皆仿照

寧壽宮制度其園寓點綴與圓明園蓬島瑤臺無異不知是何  
肺腸其大罪十三薊州墳塋設立享殿開置隧道致附近居民  
有和陵之稱其大罪十四家內所藏珍珠手串二百餘較大內  
多至數倍并有大珠較御用冠頂尤大其大罪十五又寶石頂  
非伊應戴之物伊所藏數十而整塊大寶石不計其數且有內

府所無者其大罪十六銀兩衣服等件數逾千萬其大罪十七且有夾牆藏金二萬六千餘兩私庫藏金六千餘兩地窖內藏埋銀兩三百餘萬其大罪十八附近通州薊州有當舖錢店資本又不下十餘萬以首輔大臣下與小民爭利其大罪十九伊家人劉全不過下賊家奴而查抄家產竟至二十餘萬并有大珠及珍珠手串若非縱令需索何得如此豐饒其大罪二十其餘貪縱狂妄之處尙難悉數著將胡季堂原摺發交在京文武三品以上併翰詹科道閱看悉心妥議具奏如有自抒所見者另摺封陳諸臣俱言宜如胡季堂議

上念和坤曾任首輔免其肆市賜令自盡以兩淮鹽政徵瑞前後餽和坤銀四十萬兩山東巡撫伊江阿知  
太上皇帝龍馭上賓奏摺中不及一字惟致書和坤勸其節哀辦事俱予革職並

諭故御史曹錫寶當和坤聲勢薰灼之際一人敢於糾劾而曹錫寶獨能抗辭執奏不愧諍臣之職今和坤治罪後查辦劉全家產竟有二十餘萬之多是曹寶錫前次所劾信屬不虛自宜

加以優獎曹寶錫著加恩追贈副都御史並將伊子照贈銜予  
廕既而

上又通諭諸臣曰和坤所管衙門本多由其保舉升擢者自必  
不少外省官員奔走門下逢迎餽賂皆所不免若一一根究亦  
非罰不及衆之義大小臣工無庸心存疑懼況臣工內中才居  
多卽有從前熱中躁進一時失足但能洗心滌慮痛改前非仍  
可勉爲端士以副朕咸與維新之治時多言和坤財產甚多不  
止抄出之數者又

諭曰朕所以辦理和坤者原因其蠹國病民專擅狂悖查抄所  
以懲戒貪黷初不計多寡而事株連嗣後臣工不得再以和坤  
貲產妄行瀆奏先是和坤在軍機時慮人舉發凡有奏摺令具  
副本關會軍機處至是奉

旨革除和坤又令各部將年老平庸之司員保送御史俾其緘  
默不言免于糾劾至是亦因御史賡音布奏

命嗣後保送御史年不得過六十五以上又

諭曰朕恭閱

皇考硃筆有嚴禁內外大臣呈進貢物

諭旨二道

聖訓煌煌

垂爲至爲深切祇因和珅攬權納賄凡遇外省督撫呈進物件准遞與否必須先向和珅關白伊卽擅自准駁明示有權而督撫等所進貢物

皇考不過賞收一二其餘盡入和珅私宅是以我

皇考雖屢經禁止仍未杜絕嗣後有將飭禁之物呈進者卽以違制論初乾隆五十四年山西舉人薛載熙覆試除名嘉慶六年載熙在燕郊迎

駕

命試以詩並

諭曰從前薛載熙中式時覆試文理尙無大疵惟詩句粗率奏請停科經

皇考加恩寬免嗣和珅等議覆科場事宜以薛載熙覆試與中卷不符難保無代倩情弊請追革在案是薛載熙斥革本非

皇考之意和珅辦理此事實屬有意從刻今薛載熙考試詩句較前稍勝著加恩賞還舉人其年又有湖北按察使李天培代福康安私交糧船分運桅木一事時和珅弟和琳爲巡漕御史劾奏之福康安因得

嚴旨並帶革職留任至是

上諭曰此案並非和琳秉公劾參實係聽受和珅指使爲傾陷福康安之計今和珅籍沒查出所蓋房屋僭妄踰制較之福康安托帶木植之咎孰重孰輕尋又

諭曰近聞京師步軍統領衙門及巡捕五營所管步甲兵丁在和珅宅內供私役者竟有千餘名之多實出情理之外國家設立兵額原資捕盜緝匪之用豈可將歸伍之兵供私宅之役無怪乎兵數日少盜賊肆行也子豐仲殷德固倫額駙和珅旣得罪戾議革世襲以額駙故

詔仍留伯爵後其家抄出正珠朝珠詢之家人僉稱和珅往往于燈下無人時私自懸掛臨鏡徘徊對影笑語聲息甚低人不得聞奉



旨正珠朝珠爲乘輿服用珍物豈臣下所應收藏家人供出和  
坤情狀竟有謀爲不軌之意今幸逃顯戮姑免磔屍其子豐伸  
殷德若知有此物不行舉發當照大逆例緣坐今經綿恩等訊  
究實不知情加恩免其追問但不應仍叨世襲著革去伯爵賞  
給散秩大臣銜當差行走既而

上和坤三等輕車都尉係伊高祖尼牙哈那巴圖魯軍功所  
得仍予豐伸殷德承襲七年三省教匪平

推恩復公爵八年長史奎福訐告豐伸殷德演武圖爲不軌並  
欲毒害公主及將侍妾帶至墳園于國服內生女訊惟生女是  
實仍革去公爵在家圈禁十一年正月擢頭等侍衛四月授正  
白旗蒙古副都統

賞戴花翎十二年二月調鑲藍旗滿洲副都統十二月

賞給伯爵銜十五年四月

賞給公爵銜是月卒無子其輕車都尉世職以和琳之子豐伸  
伊綿襲初和坤於乾隆四十一年入正黃旗及得罪仍隸正紅  
旗

盛住喜塔臘氏正白旗滿洲人由監生考取中書乾隆三十四年遷侍讀三十六年五月授直隸大名道九月調霸昌道四十四年補通永道四十六年正月調浙江杭嘉湖道十二月擢浙江布政使尋兼管杭州織造並南北稅務與閩浙總督陳輝祖兼辦海塘修築事四十七年四月

諭曰盛住奏趕辦魚鱗石塘及查勘柴石各工情形海塘改建石工爲一勞永逸之計較之柴塘足資抵禦著于海塘竣功之後將歲修柴塘卽行停止再稱東塘尖山等處較前月陰沙增寬增長于海塘最爲有益且柴石各工爲外層擁護將來工程尤資穩固殊爲欣慰五月經陳輝祖奏海塘頭團開濬引河江湖暢順得

旨交部議敍六月奏言浙江通省額貯常平倉穀二百七十八萬餘石內出糶穀四十七萬六千一百餘石上年秋成後買補二十四萬七千九百九十餘石尙未補二十二萬八千一百石零恐各州縣以貯穀不無耗折藉口價昂希冀延緩該管知府於所屬買補遲延向無處分請嗣後各州縣春間平糶之後該

知府提糶價貯庫秋成之後卽責成飭屬買補務令一律買補上倉盤驗結報如實有災歉價昂不敷情形由府覈實結報不難通融籌辦倘再遲延請定以處分報

聞會總督陳輝祖籍沒巡撫王亶望貲產多有不實

諭令察訪遂廉得轉換隱匿狀以

聞

上命大學士阿桂暨戶部侍郎福長安按其事得衢州府知府王士澣供估冊互異緣由入奏十一月

諭曰阿桂等審擬陳輝祖查抄王亶望貲財私行抵換內估冊二分前後互異據王士澣供初造估冊係照底冊繕寫因國棟嫌價輕加添是以回明盛住減銀另造前盛住奏稱估冊互異不能覺察請交部嚴議今閱此供情弊顯然安得諉爲不知況朕降旨令盛住密行查訪何以初次覆奏並無一語提及至續奏查出王士澣所造底冊與進呈冊不符仍未將刪減之處聲敘及阿桂等徹底查出始以不能覺察爲詞旣狗隱于前又復有心取巧姑念此案由伊查出端倪始行敗露是以未加嚴譴

著傳旨嚴行申飭旋經部議革職

命改革職留任五十年以旱災南北關課入頗歉奏請議罰

諭曰盛住關稅短少原可加恩寬免但于地方旱災不及早陳奏意存漠視所有此項虧缺銀兩令照數賠償以示懲儆五十年二月以奏銷新建魚鱗石塘各工不實部議革任

命免革任仍註冊先是總督富勒渾以浙省倉庫虧缺于四十八年奏明勒限彌補至是幾四年巡撫福崧猶以數多未易全補懇請展限

命尙書曹文植侍郎姜晟伊齡阿查究尋奏從前虧缺開報一百三四十萬兩除已彌補者現未完尙三十三萬二千兩有奇三月

諭曰盛住身爲藩司錢糧是其專責不能督飭所屬依限全完不可仍留藩司之任著革去藩司留內務府郎中專辦織造事務適學政寶光稟奏浙省倉庫虧缺甚多並奏盛住上年進京攜貲過豐外間頗有煩言得

旨解盛住任

命大學士阿桂會同曹文植等查訊尋訊明覆奏

諭曰據阿桂奏竇光鼐所稱盛住上年進京攜帶過豐面訊該學政不能指實傳訊盛住則因上年進京時有應繳復價銀三萬九千兩餘赴廣儲司兌交有案是盛住攜帶銀兩係屬官物豈可指爲贓私之証至盛住所稱進京時並無給送十五阿哥物件阿哥亦從不許其幫助等語阿哥等素常謹慎宮中廩給亦優本無需伊等幫助之處盛住所言似屬可信朕閱之深爲嘉悅盛住尋回織造任時光鼐續劾宣平縣知縣黃梅貪黷歟蹟復

命阿桂會同江蘇巡撫閔鶚元查辦得實九月

諭曰黃梅貪黷營私歷任上司毫無覺察實難辭咎前任藩司盛住在任最久置若罔聞姑容闕冗不應仍留織造著卽革去翎頂來京候旨旋奉

旨賞主事銜令自備資斧前往伊犁充當糧餉章京五十二年十二月擢塔爾巴哈台領隊大臣五十三年十月調庫爾喀喇烏蘇辦事大臣五十四年七月

諭令回京九月以頭等侍衛銜授熱河總管五十六年十月授  
粵海關監督五十七年三月會同兩廣總督郭世勳奏大黃一  
項爲英吉利等國療疾所需請令照常買運免其限五百斤定  
數

從之五十八年五月調淮關監督六十年查驗糧船過嚴爲漕  
督管幹貞所劾三月

諭曰漕船當催趲緊要之時豈可過于留難況京城百貨全賴  
漕船攜帶前來旗丁亦藉以稍沾餘潤若不能如期而至不特  
有誤回空且市價必致騰貴既非所以便民恤丁而關口過嚴  
商販亦必聞風裹足轉致徵收短少盛住前任藩司緣事革職  
復經加恩錄用今於監督事務又復過於嚴刻實難辭咎著解  
任來京交部嚴加議處部議革職五月

恩賞圓明園拜唐阿効力贖罪八月經准關監督劉樸覆奏前  
事

諭曰盛住在淮關如有例外徵收侵蝕入己等弊自應從重治  
罪今查明祇因稅短辦理稍嚴其咎尙輕加恩賞給內務府佐

領職銜管理暢春園三山事務九月擢總管內務府大臣嘉慶元年正月

賞襲一等承恩侯三年四月

賞戴花翎七月授鑲藍旗漢軍副都統十一月以監修乾清宮工程交部議敍四年正月授工部右侍郎旋署工部尙書管理御茶膳房太醫院御藥房事務署崇文門監督尋授崇文門副監督三月罷內務府大臣督辦

萬年吉地工程帶管印鑰四月

諭曰元年正月十一日曾欽奉

高宗純皇帝勅旨得將

孝淑皇后之兄盛住封爲侯爵並奉有將來晉封公爵之

諭本日值吏部具題

孝儀純皇后推封外戚一本已依議因思

孝淑皇后業經薨逝其母族昆弟應照從前

勅旨一例推恩盛住著晉封三等承恩公五月調戶部右侍郎

正藍旗滿洲副都統九月擢正□旗漢軍都統十月授內務府

大臣

賜紫禁城騎馬五年閏四月內務府請售庫貯器物並將玉寶呈進

諭曰內務府大臣等將庫貯珠玉磁器等件奏請變價節經呈覽朕皆不准甚至本日將玉寶亦列入進呈尤屬大謬此項玉寶何人敢用令軍機大臣傳訊盛住據稱本係奏明呈覽請旨分別辦理並不敢擬以發售更屬巧辨伊等既冒昧于前又復狡飾于後盛住沾沾言利已非一次此事自係伊一人倡議即本日飾詞分別亦係盛住主見朕在藩邸時深悉其人器小貪利今又屢次獲咎不可不加之懲戒伊所得公爵因係

皇考所封免其斥去其餘各項職任全行革退著以公爵授爲西陵總管內務府大臣辦理萬年吉地工程若能改過自新安靜妥協俟

孝淑皇后奉安後再加恩內用六年十一月復請將

萬年吉地方城臨清甄券改用清白石券

諭曰陵工應用工石均有定制豈容輕爲更易從前



泰陵方城既用臨清甄券自應恪遵辦理節省尙不可況以石易甄需費甚多盛住係在工專辦之人此必欲爲浮銷地步伊自承辦工程總以例價不敷爲詞此奏尤爲不合著交部議處八年以

萬年吉地工程堅固

賞戴雙眼花翎並交部議敘九年五月奉

上諭泰寧鎮總兵著長興調補其總督內務府大臣事務仍著盛住管理六月署泰寧鎮總兵十二月爲

西陵贊禮郎清安泰列款具控

命侍郎英和戴均元前往履勘先行拔去花翎解任嚴訊旋訊得實

諭曰盛住爲總管大臣于朔望拈香典禮自應敬謹親往卽因病不能行禮亦當知會守

陵之貝勒貝子公等代爲拈香乃竟私行委員前行褻怠已甚至

陵寢重地風水攸關白椿以外青椿以內如有設窑燒灰放火

燒山取土取石均干例禁盛住擅准開採實屬膽大妄爲卽此  
二款其罪甚重革去公爵及總管內務府大臣鎖拏來京按律  
定擬經軍機大臣問擬斬決

諭曰盛住係

孝淑皇后之兄斷不肯稍存姑息亦不肯有意從嚴惟酌斟情  
理權衡定罪

陵寢重地界限綦嚴如果盛住在紅椿以內開採山石則法無  
可貸今在白椿以外其間本有行宮廟宇營房及居民田舍與  
切近禁地者不同查乾隆四十二年馬蘭鎮總兵滿斗於五花  
峰嶺口拆開石牆乘馬往來意圖自便曾經問擬斬決猶蒙

皇考高宗純皇帝鑒其法重情輕

特降諭旨引唐書權善才等誤斧昭陵柏一事改爲斬候今盛  
住所採山石係辦理營房所用較之滿斗又有公私之別自當  
量予原減著加免恩死發往烏魯木齊効力贖罪十年七月復  
授三等侍衛古城領隊大臣尋改葉爾羌辦事大臣十二年三  
月擢頭等侍衛仍留葉爾羌辦事十月擢鑲黃旗蒙古副都統

尋卒

諭曰盛住簡任中外宣力有年前因獲咎發往新疆等處均屬妥協著加恩賞給副都統卹典十三年六月經甄商孫興控告筆帖式雙福等侵冒

萬年吉地工程銀兩

命軍機大臣會同刑部審訊得盛住前後侵用狀

諭曰盛住屢經獲咎皆格外保全應加倍敬謹小心今所爲如此豈能曲爲寬宥既已身故無可追論著將前賞給副都統銜斥革並追回所得卹典所遺家產嚴密查抄伊子吏部郎中達林整儀尉慶林候補筆帖式豐林孫候補筆帖式崇恩崇喜著一併革職交刑部俟定案問擬罪名請旨辦理七月定擬入奏諭曰萬年吉地係朕卽位之初仰蒙

高宗純皇帝所賜朕于親政後簡派盛住專司其事盛住渥承皇考厚恩加封侯爵朕又特沛恩施晉封公爵伊果具有天良應如何實力實心勉圖報稱詎意辦理草率侵蝕官項入己至九萬兩之多飭法營私首先舞弊以致工員相率效尤罔知顧

忌實屬喪心昧良使其身尙存朕必親加廷訊立予刑誅若係承修

先朝陵寢有此不法情事必剖棺戮屍追正其罪今係吉地工程爲日方長正可從修容理是以稍從未減伊之所以侵用帑金任意借扣者總緣雙福鶴齡慫恿舞弊狼狽爲奸各供認分用正項帑銀三千兩其未經查明私肥入己者正不知凡幾著刑部提雙福加以刑夾鶴齡重責三十板令盛住之子及孫環跪閱視以昭炯戒是月發遣達林崇恩崇喜往黑龍江慶林豐林往吉林當差嗣奉

恩旨先後釋回

宗室額勒亨額滿洲正白旗人乾隆三十四年由十五善射授三等侍衛洵陞護軍參領四十五年擢莊浪城守尉四十六年蘭州逆回蘇四十三陷河州三月額勒亨額帶涼州兵偕總兵德寧擊賊于黃河南岸賊退據山梁屢敗之斬獲甚多得

旨優敘

賞戴花翎並大小荷包六月攻賊于華林寺盡奪賊卡首逆蘇

四十三就殲四十九年五月進勦逆回田五等敗之于田家山旋攻破石峯堡賊平與有功五十一年調鳳凰城城守尉五十五年因親老回京授頭等侍衛嘉慶三年補開原城守尉十月擢盛京副都統四年八月

命帶盛京兵協勦湖北邪匪九月抵南陽時楚匪李淑張漢潮等竄擾陝境河南巡撫吳熊光奏令取道鎮平入陝

諭曰此次盛京官兵在途行走遵奉約束甚屬安靜朕已密經訪聞皆由額勒亨額督率得宜深爲可嘉今額勒亨額行抵南陽面見吳熊光商定將官兵二千分爲四起額勒亨額先帶頭起由南陽赴陝豫交界之荊子關一面飛飭後起兵各陸續前進所辦俱妥十一月川匪竄近漢江參贊大臣那彥成以江岸地勢平衍馬隊得力奏令帶盛京兵一千徑赴紫陽會合總兵柯藩堵勦十二月太平股匪龍紹周唐大信由西鄉竄入紫陽柯藩截擊之賊走望虎山適額勒亨額兵至殲戮無算西鄉賊分爲兩股一竄繞溪河一竄裘家溝連次搶渡漢江額勒亨額與柯藩擊退之五年正月高家營戴家營各賊分股偷渡石泉

江岸二月

諭陝西巡撫台布酌量情形或派額勒亨額柯藩等抽撥防丁協勦石泉等處竄匪尋台布以川匪苟文明鮮大川及龍唐各股在漢江以南奔竄無定所有平利紫陽安康等縣向來責成額勒亨額等堵禦且額勒亨額馬隊檄令入山亦恐未能施展未便調動奏

聞三月

上以額勒亨額柯藩等近日總未見打仗而額勒亨額尤不出力切責之仍

諭經略大臣額勒登保查明防守各員如並非必不可離之地卽調赴經略大營派令勦賊尋以楚匪樊人傑王朝貴等竄近陝省平利縣台布令額勒亨額帶同侍衛將弁于紫陽之任河上下往來截殺不令搶渡八月龍唐二逆復分股擾紫陽額勒亨額率兵由魯家坊渡河與署紫陽令張占帶領鄉勇擊敗之九月敗楚匪冉學勝張世龍于康家壩獲賊探張老么郝二劉芳王學義等斬之旋追至螞蝗埡葉家壩等處生擒賊目王學

存等十六名賊竄宦姑灘江岸官兵由瓦房店邀擊之皆有斬獲經額勒登保奏

聞得

旨嘉獎十月額勒登保遣總兵楊遇春由西鄉進邀會合額勒亨額于瓦房店緊躡冉張各匪楊遇春敗賊于銀硃壩賊由芭蕉口竄出額勒亨額帶兵追截獲賊黨鄭德平等又偵知襄陽股匪曾芝秀由繞溪河欲竄鐵佛寺額勒亨額迎擊之追殺三十餘里斬獲百餘人先是龍唐二逆屢犯川陝邊界甘省勦敗之楚匪高均德餘黨高二馬五等匪亦由沔縣奔入西鄉復竄入紫陽之朱溪河額勒亨額帶兵分截賊南竄十二月賊自紫陽權河來窺江岸擊退之六年二月調三姓副都統時賊復由紫陽南奔小道河竄安康所屬五塊石躡淺過江經額勒登保參奏請將額勒亨額拔去花翎留紫陽防堵以觀後效

上以額勒亨額係專派紫陽防江之員拔去花翎不足示懲

勅部嚴議尋議褫職

諭曰額勒亨額未能豫爲防範部議革職固屬咎所應得但念

賊匪偷渡時若額勒亨額係在該處專司防守之員卽革職尙  
不足以示懲今旣查明賊匪偷渡處所距額勒亨額駐劄地方  
尙有八九十里與專司安康汛地者有間著加恩改爲革職留  
任八年無過方准開復五月因病回京調理九月赴三姓副都  
統任七年卒子綽勒明阿十五善射次子綽勒洪阿現任

東陵郎中

觀祥什忒氏鑲白旗蒙古人由健銳營前鋒于乾隆三十四年  
補前鋒校三十七年擢委烏鎗護軍參領隨副將軍阿桂赴金  
川軍營三十八年六月攻小金川僧格宗一帶由色木則後山  
潛抵賊卡賊番從山箐侵犯納圍糧站適觀祥帶護礮兵五百  
餘名行至擊敗之擢副烏鎗護軍參領四十年授護軍參領五  
十年擢甘肅洮岷協副將五十四年署西寧鎮總兵嘉慶元年  
湖北教匪滋事六月偕甘肅涼州鎮總兵德光帶陝兵一千名  
馳赴孝感進勦七月陝甘總督宜綿檄令馳赴當陽勦賊會當  
陽克復湖廣總督畢沅令赴鍾祥會同總兵楊秀合力搜捕八  
月駐營鍾祥縣北要隘處所土門冲賊屢率衆來攻又分隊焚



掠附近村莊直逼糧臺將軍明亮添設三營飭觀祥與楊秀德光等禦之尋合兵四面圍剿殺賊無算生擒十七名明亮奏入賞玉搬指大小荷包大兵進攻五朶寺逼近賊巢賊分道出劫明亮先令觀祥等伏山岡夾擊賊十一月隨領隊大臣舒亮帶固原兵追敗賊衆于草店北十二月偕德光帶綠營兵破王家城賊壘賊竄入梓山湖北巡撫惠齡奏入

諭曰觀祥等着惠齡存記如果始終出力卽咨部議敘尋攻梓山賊營賊東竄惠齡令觀祥帶兵一千名繞至官潭及之觀祥連射二賊賊大潰乘勝追斬獲首級一百二十顆生擒二十五名賊奔聚興隆集二年正月元旦從惠齡大敗賊於槐樹岡殲戮甚多奏入

賞給阿克達楚喀巴圖魯名號擢宣化鎮總兵六月楚匪竄入川省觀祥追至安坪值暴雨山水驟發馬兵損傷器械帳房漂沒

上飭之十一月賊首姚之富齊王氏等竄入漢中南山連營二十餘里欲乘間北渡觀祥隨西安將軍恒瑞設伏新街子沿江

路口半渡蹙之淹斃賊匪無數賊竄沔寧交界桑樹灣恒瑞先  
令帶撒拉爾回兵之都司馬鍾麒改換鄉勇旗號誘敵賊攻鍾  
麒方急觀祥掩至賊出不意驚竄西北老林十二月隨恒瑞會  
勦儀隴營山賊巢行抵迴龍場遇由陝竄入閬中賊匪數千犯  
保寧城觀祥截殺七八百人疏通道路

賞大小荷包三年正月營山縣告急馳兵解其圍追擊賊衆連  
敗之賊首羅其清竄巴州邊界焚掠儀隴縣城觀祥從恒瑞分  
兵進勦三月敗羅逆於孫家梁六月賊欲與冉文儔高均德股  
匪合經觀祥截殺甚多七月禦冉文儔等于土門埡占其山梁  
賊奔大神山復分三路進攻觀祥隨恒瑞從北面攻入克獲大  
神山高均德冉文儔合夥竄至龍鳳坪羅其清股匪屯聚箕山  
相距三十餘里中有馬鞍山勢甚陡削賊據險設卡扼守八月  
恒瑞與觀祥攻克馬鞍山復與大兵攻克龍鳳坪賊向觀音崖  
奔竄九月攻徐添德樊人傑於插旗山克之賊匪合衆箕山觀  
祥由固州寨進勦旋堵勦攔路埡十二灣一帶俱有斬獲十月  
隨四川將軍富成攻羅其清于大鵬寨十一月克之卽帶兵隨

恒瑞赴陝截勦北竄賊匪四年四月賊匪分竄鳳翔汧陽張映祥股匪又分藍白二號奔竄甘肅境內觀祥往來堵截九月明亮敗藍號張漢潮股匪于清水溝觀祥迎擊頗有斬獲十月張漢潮就俘餘匪李得士毛起忠率衆屯聚大建溝十一月觀祥由黃柏園進攻賊匪四散復追于清水溝五年正月殺賊于七佛溝冒雪進兵擒賊二十七名脫被擄男婦四十一名二月川省賊兵竄漢江觀祥帶兵隨巡撫台布由鎮安五郎兜截六月白號楊開甲股匪從螯屋辛峪竄出觀祥率步隊截回尋追殺再學勝股匪于唐藏又隨陝甘總督長麟追賊于康家河觀祥帶馬隊先行截賊匪爲兩段賊奔錦雞嶺觀祥從右抄上擒斬甚衆

上以其出力嘉之七月攻賊匪伍金柱冉學勝張三龍于傅家鎮追至堰牛山觀祥偕已革將軍富成分左右擊之時屆昏黑伏賊齊起富成馬蹶落崖觀祥馳救短兵相接賊始退諭曰觀祥本在左首山坡進攻聞富成于右首山坡被賊撲壓急趨策應雖未能將富成救出但奮力衝殺賊匪全數退回亦

屬可嘉著交部議敘以示鼓勵八月觀祥帶兵在大川壩堵勦又于四合頭利橋一帶搜緝殺賊甚多九月伍金柱餘匪由唐藏大渠折回甘肅境經略大臣額勒登保令觀祥就近由鳳縣兜勦不使竄過棧道以東復截賊于燕家溝偕副將游雲棟從留壩沔縣兜回攔截

諭曰觀祥由棧道截回一股賊匪節經趕殺多有斬獲現已逼向略沔境內無虞其再行竄折所辦俱好十月自略陽追賊過漢江至螞蝗溝殺賊一百餘名生擒二十餘名餘匪逼出陝境六年正月駐兵黃關嶺專守南鄭褒城地方營卡四月固原提督楊遇春追高馬兩股餘匪于荒耳山觀祥從板蒼壩兜擊餘黨斬獲無遺五月長麟追殺高二餘匪至茅坪溝賊欲向八廟河奔逃適觀祥在關口攔截折回西南是月觀祥自呈節次出兵帶傷及年老衰病情形經額勒登保奏聞請以原品休致奉

旨准其休致

賞給全俸回旗調養十六年卒子訥莫恩上虞備用處拜唐阿

永寧趙氏鑲藍旗滿洲人乾隆三十四年由烏鎗護軍授護軍校隨征緬甸三十九年隨征金川四十一年擢委護軍參領四十年補副護軍參領四十九年從大學士阿桂出師石峯堡五十年補護軍參領五十一年授貴州定廣協副將五十六年擢雲南普洱鎮總兵嘉慶元年威遠邊外野獐因饑搶掠屯聚牛肩山九月永寧偕巡撫江蘭率土練攻破之獐匪乞降奏入賞戴花翎大小荷包並交部議敘二年四月威遠獐首扎杜逃回猛班地方復糾衆滋事經官兵擒獲雲南總督勒保參奏永寧前次辦理貽誤此次亦不甚出力奉

旨永寧著交部嚴加議處部議革職

命留滇黔二省効力時貴州狃苗滋事賊首王囊仙韋七縉鬚踞洞洒當丈兩處爲巢穴賊目賀阿豆等堅守安有山梁八月勒保督兵攻擊派永寧伏兵山坡下伺賊匪下山圍勦斃賊多名燬安有寨勒保尋分五路進攻洞洒派永寧率同游擊陳耀先等爲一路會各路官兵合擊連破卡寨直抵賊巢固守永寧等毀垣入率兵生擒賊首王囊仙及餘匪甚多其當丈賊巢亦

經官兵洗蕩擒賊首韋七縉鬚奏入

賞青玉喜字搬指大小荷包以副將卽用尋進兵巴林擒賊首  
玉抱羊賊目王承相等九月苗匪竄屯些寶硎永寧偕□將王  
凱連擊破之並移師殲賊于壩溝壘隱寨壘等處十一月補雲  
貴督標中軍副將事平擢貴州古州鎮總兵五年六月調赴四  
川軍營協勦邪匪七月從總督勒保兜截巴州白號苟文明鮮  
大川等賊股於江北八月東鄉白號張子聰劉朝選湯思蛟等  
賊股竄陝西洋縣之茅坪永寧等追勦至黃土梁殲獲甚多復  
偕副都統溫春等冒雨追躡至倒流水斃賊數百後起賊匪由  
馬鞍山石窩場竄逸永寧率參將田朝貴擊之于桂家灣尋由  
馬家坡抄出遇賊與勒保等兩面夾攻敗之擒僞先鋒陳元等  
五十六名時張子聰劉朝選湯思蛟俱在太平大寧老林內藏  
匿

諭交永寧上緊搜捕勿令竄往他處十月追勦湯劉二逆至桃  
核壩聞黃白藍三號賊匪及樊人傑股匪由楚省竄至徐家壩  
回兵追襲並從勒保屢敗于天池壩八臺山等處沿途俱有斬

獲通江藍號王士虎分夥圍攻邱家灣寨永寧擊走之斃賊七  
八十名生擒曾廷桂等七十四名

上嘉之十一月率游擊桂涵搜捕東鄉開縣連界之大旺山內  
零匪斃賊目賀章祿等四十三名生擒梅盛雙等二十名襄陽  
白號楊開第黃號齊幗謨通江藍號李炳等五股賊匪合夥窺  
伺嘉陵江參贊大臣德楞泰督同永寧等馳勦先斃賊探數十  
名遂敗之于騎龍寨埡追斬楊開第齊幗謨奉

旨交部議敘十二月躡勦李炳及楊開第餘黨于通江之烏林  
埡賊向平河北寨欲入廣元寧羌老山永寧偕都司田中桂禦  
之並從勒保擊走白二號楊步青劉朝選等股匪六年正月從  
勒保陣斬太平黃號賊目徐萬富于儀龍碑灣寺擒先鋒陳上  
達斃偽總兵解奇林等奏入奉

旨交部議敘二月藍號陳朝觀與白號魏棒棒等合夥欲由萬  
縣竄掠梁山墊江一帶勒保料賊必來劫營派守備薛升帶兵  
設伏賊果夜至伏發永寧出卡接應殲擒賊首白如桂等百數  
十名四月督副將田朝貴等禦劉朝選湯思蛟等賊冒雨馳抵

楊柳池乘間奪據靈官廟賊卡進逼馬家營直搗賊巢復追賊由老林出山至謝家壩與勒保會合偵知賊向風竹塘楊柳壩竄走永寧等隨勦隨進至白草壩前後斬獲甚多復

諭交部議敘五月黃號辛聰及湯思蛟王士虎餘黨王士萬等合夥以竿龍貯硿有庫米率衆圍攻永寧等帶兵馳救賊遁乘勝追殺疊有斬獲尋勦黃號龍紹周餘黨唐明萬李顯必股匪于楚境竹山縣之柳林店地方賊竄回川境永寧等隨勒保邀之于雲陽三面兜勦斃李顯必九月督兵防守嘉陵江岸賊不能渡八年因病請假回京十一月病痊授頭等侍衛十年四月卒

卷三十四



滿漢大臣列傳

卷三十五

明興

奇豐額

德楞泰

明興富察氏鑲黃旗滿洲人乾隆三十四年由戶部八品筆帖式授直隸保定府理事同知調熱河同知四十年擢天津府知府四十三年十月擢天津道十一月以錦州協領富伸保等辦差科斂一案

諭令明興體訪覆奏得實四十六年擢直隸布政使四十七年四月擢山東巡撫御史錢澧奏查山東虧缺

上以明興係新任巡撫無所瞻顧

諭將章邱東平益都與歷城一律親往盤查至通省州縣著明興詳查妥辦予限彌補七月奏查通省虧缺約有二百餘萬得旨着照虧缺多寡員缺大小覈定期限統于一二年全數彌補以清帑項尋奏通省依限全完又以曹兗濟寧各州縣衛六月後連值大雨湖河漲溢地畝被淹遵旨查勘奏請展賑

上獎其所辦均屬妥協五十一年閏七月以歷城監犯許四妮等九名同時越獄交部嚴議嗣以直隸大名劫獄戕官一案首犯段文經徐克展在逃未獲

諭曰明興等平日俱能辦事此案正犯竟不能弋獲將何顏見朕九月以司監斬犯段文經等二十名脫械反獄交部嚴議又以兩次越獄案犯及大名正犯日久未獲部議革職得旨從寬留任五十二年二月

諭曰山東連有越獄之案明興既不能先事防範臨時又不能妥速弋獲大名案內段文經雖在直隸滋事而八卦邪教多在單冠二縣明興疎縱之咎已無可辭及段文經逃至館陶又不能卽時弋獲今日久未獲該撫恐懼惶惑一籌莫展豈可復留巡撫之任致滋貽誤著來京候旨尋以明興獲咎因辦理地方公事不能振作尙無大過補授刑部侍郎四月

命赴山東督濬河道五月奏會勘挑濬寧陽之楊家閘汶源各泉一律疏濬得

旨好一切實力爲之正汝補過之處也七月工竣授山西巡撫

十一月以大同一帶歉收明興辦理賑卹事宜錯行銀米尋復飾詞迴護又以山東巡撫長麟拏獲窩棍糾竊訊出歷年積案明興前在山東有年不能飭屬查拏屢奉

嚴旨申飭五十三年七月授烏什辦事大臣五十四年二月

命署理阿克蘇領隊大臣事務

諭曰明興前在巡撫任內聲名甚屬平常並未將伊治罪令其前往烏什今又令其署理阿克蘇事務新疆回地尤當潔己奉公倘仍向回衆需索必從重治罪六月調赴葉爾羌辦事十月授兵部侍郎五十七年五月調吏部侍郎九月調刑部侍郎十二月授喀什噶爾參贊大臣五十八年五月因辦理薩木薩克及霍罕地方外番之事與葉爾羌辦事大臣雅德意見不協奉旨離任仍交部嚴議六月授二等侍衛赴庫爾喀喇烏蘇辦事嘉慶元年十一月川陝教匪滋事明興奏由葉爾羌赴商南一帶協勦

諭以明興雖未經軍旅而於交界幫同截拏亦屬有益旋以商屬寧謐隨陝甘總督宜綿往達州會勦川匪二年二月賊首徐

添德王三槐冷添祿等屯踞東鄉縣治接引巴州通江賊窺侍  
太平經明興等帶兵進攻截賊勾合之路偵知徐添德遠救王  
家寨守營之賊不多乘虛痛勦燬奪賊寨遂復東鄉三月賊遁  
踞清溪場金峨寺將軍明亮等分飭明興以木筏冒雨渡河潛  
令善囚人赴東岸斷賊船纜索賊不及救我兵擁入清溪口盡  
奪賊卡四月賊潛撲清溪營擊却之尋官兵攻破金峨寺明興  
邀擊之于陰洞殺賊三百餘獲大礮八軍器一百餘又率兵由  
鐵丁埡攻取茨菇梁賊卡五月隨領侍衛內大臣德楞泰奪獲  
分水嶺火石嶺賊寨賊首王三槐分擾北路毛坪明興等敗之  
六月官兵痛殲賊衆于重石子香爐坪陳家壩南天洞各處明  
興均以帶兵策應有功奏入疊奉

恩旨嘉獎

賞玉鞞香囊荷包等有差七月宜綿奏大兵前赴夔州請令明  
興赴夔督辦糧餉九月調赴湖北宜昌一路轉運軍需三年正  
月賊衆屯聚開縣境內明興隨總統勒保禦之于石壩山白沙  
河屬有斬獲三月官兵至土城埡賊分股撲營經明興等截殺

又進兵正登寨先後斃賊無算五月王三槐等由渠縣分竄梁  
墊江明興在梁墊交界截擊敗賊于觀音巖又由鐵索橋追賊  
至青岡嶺山勢高峻督兵仰攻自辰至未斃賊七八百人卽佔  
營山梁賊潛夜撲營明興右膀右腿俱受矛傷仍指揮兵勇擊  
退賊衆奏入

上嘉其奮勉授頭等侍衛四年正月明興在達州養傷會成都  
副都統勒禮善帶滿洲兵駐達州防守病卒總督勒保奏明興  
就近暫署勒禮善遺缺管帶原駐滿洲兵彈壓尋奉

命卽授成都副都統接辦川省糧餉三月以辦理糧餉未善奉  
旨撤回軍營十月明興養傷平復奏懇調省兵四百名帶領勦  
捕

諭經略額勒登保調明興赴營酌令搜勦以試其能到營後或  
報効或退縮據實具奏尋額勒登保覆奏明興年近六旬新受  
矛傷恐未能趕賊打仗查明興前在開縣設立營寨賊未敢侵  
若調至軍營該處又須遣人接辦請仍留明興在彼酌給兵丁  
禦小股賊匪

諭如所請行尋調正白旗漢軍副都統

命回京供職五年二月以副都統銜授吐魯番領隊大臣七年七月調庫爾喀喇烏蘇領隊大臣九月調喀喇沙爾辦事大臣十月

命回京署鑲藍旗漢軍副都統旋授正黃旗蒙古副都統八年五月調鑲藍旗漢軍副都統十月調正黃旗滿洲副都統十一月署熱河副都統十二月授理藩院右侍郎署鑲藍旗滿洲副都統九年六月署工部侍郎七月調理藩院左侍郎九月調工部右侍郎十二月調正白旗滿洲副都統十年十二月以喀喇沙爾糧員伊精額虧缺庫項一案訊據明興家人供稱伊主收受盤費屬實奉

旨革職旋訊明明興家人撞騙並未知情

諭賞頭等侍衛赴哈密辦事十一年二月以喀喇沙爾辦事大臣任內屬員有虧挪情弊並未參奏降四等侍衛尋復以喀喇沙爾糧員擅動庫項明興到任盤查時伊精額將兵欠造冊呈堂明興不行查究轉將印冊點驗開除致滋弊竇奉

旨革職旋

賞給七品筆帖式在刑部行走十二年二月以回疆弁兵越級戴用頂帶奉

旨傳訊明興並不據實登答

諭曰回疆給發虛頂執照起自乾隆五十六年尙係因循陋習惟明興曾任大員飾詞卸過不可不加以懲處明興著革去筆帖式發往熱河充當馬甲八月仍奉

命以刑部筆帖式用九月卒子和倫貴州平遠協副將全倫江西南昌城守營副將貴倫廣西潯州府通判重倫戶部銀庫員外郎啟倫安徽寧國營參將秀倫戶部員外郎

奇豐額內務府正白旗滿洲人祖出朝鮮黃氏由乾隆三十四年進士以主事用在刑部學習行走三十五年派委提牢年滿授陝西司主事洊擢刑部四川司員外郎河南司兩遇京察皆列一等四十二年擢廣東高廉道四十五年擢貴州按察使四十七年擢安徽布政使四十九年調廣西布政使五十二年調江蘇布政使五十七年五月擢江蘇巡撫八月奏江南沿海多

口凡商漁船隻赴海領照卽于照內註明舵工水手姓名年貌住址俟攏收口岸覈對相符方准貿易而近來海洋行劫之案往往連船劫奪冒認姓名年貌竟至無覺察請嗣後商漁船隻照票內舵工水手人等年貌項下將箕斗驗明添註出入按名查驗如手水人等在洋患病雇別船水手令該船戶于收口時具結呈報該管官于新雇水手年貌項下亦填註箕斗仍驗明同船戶各箕斗相符方許具保

上從之十二月奏山東本年被災經臣奏准委員採買平糶查江南淮徐二府秋收豐稔現飭地方官嚴禁市僧居奇東省委員已于審灣順河仲興等集採買黃豆等糧一萬一千餘石先行趕運得

旨嘉獎五十八年正月兼署兩淮鹽政三月奏籌銷淮北綱食積引以清課運下部議行五十九年六月

諭曰奇豐額于巴寧阿與商人交結一事前經降旨詢問未據實參劾實屬徇庇本應革職姑念究係地方官又不同城與董情罪有間著交部嚴加議處部議革職得



旨改爲從寬留任十一月奏拏獲販賣小錢人犯張世揚等按律懲辦

諭曰所辦甚好奇豐額于此案查辦認真著賞給大荷包一對小荷包四個用示嘉獎六十年三月奏減價平糶以裕民食得旨妥爲之勿滋弊四月濟墅關短少稅課盈餘銀兩

諭令奇豐額暫署織造監督事務將五德任內虧短情弊據實查奏尋奏五德辦理不善緣由

上以奇豐額知情袒庇交部嚴加議處部議革職

諭曰奇豐額前于巴寧阿在兩淮任內有與商人交結聯宗等事經朕降旨詢問並不據實具奏朕以其究係巡撫未經與董椿一律治罪已屬格外恩施今于五德辦理關稅不善一事又復知情不舉若非朕降旨詢問竟欲始終袒護實屬辜恩溺職斷難復膺巡撫之任著卽革職來京尋有

旨賞給郎中職銜在圓明園三山等處効力九月以二等侍衛銜補庫爾喀喇烏蘇領隊大臣嘉慶元年擢葉爾羌辦事大臣五年奉

旨回京六年經喀什噶爾參贊大臣富俊參奏從前在葉爾羌私給回子頂戴部議革職奉

旨賞給內務府主事十一年故子祝麟現任內務府郎中

德楞泰伍彌特氏正黃旗蒙古人乾隆三十五年由前鋒授藍翎長隨征金川石峯堡臺灣俱有功累遷前鋒參領

賜繼勇巴圖魯名號五十六年授健銳營翼長五十七年隨將軍福康安參贊海蘭察征廓爾喀七月以冒雨涉險攻克熱索橋等處賊寨加副都統銜事定圖形紫光閣

命儒臣製贊十一月補鑲藍旗蒙古副都統旋調正白旗滿洲副都統管理健銳營大臣五十九年三月授正紅旗護軍統領六十年二月黔苗石柳鄧楚苗石三保叛陷松桃永綏等廳

上命德楞泰帶領巴圖魯侍衛章京馳驛赴鎮箠隨雲貴總督福康安勦辦賊掠永寧哨伺永綏後路阻運道德楞泰駐兵花園隆團等處禦之屢有斬獲三月福康安解松桃永綏圍檄德楞泰前赴大營進攻賊巢時首逆吳半生與石柳鄧石三保爲聲援率衆拒大烏草河德楞泰偕都統額勒登保疊次攻克沿

河寨落七月渡河抵盛華哨山半木城甚固德楞泰相度附近山梁築小石卡一座安設礮位斷賊後路遂克木城得

旨賞賚八月克古丈坪九月進抵摩手寨賊搆石城于懸崖綿延數里德楞泰率兵勇降苗由間道至寨後出賊不意奪據石城乘勝進攻遂與額勒登保生擒吳半生于高多寨

特授內大臣十月由龍角洞進攻鴨保山克木城石卡三十餘座又克天星寨木城七石卡五獲賊目吳八月于臥盤寨賊踞平隴偕額勒登保連奪險要苗寨破其門戶嘉慶元年五月福康安卒于軍時石三保就擒平隴未下六月隨四川總督和琳先攻乾州復之七月進攻石柳鄧于平隴降三岔坪苗寨奪據強虎哨山梁八月和琳卒德楞泰仍偕額勒登保巡撫姜晟進軍平隴屢克巖人坡大壩角等苗寨九月

上命將軍明亮提督鄂輝馳往協勦十月克平隴

命署正黃旗領侍衛內大臣仍在御前侍衛上行走石柳鄧遁踞貴魚坡復于養牛塘山梁修築石卡迫脅降苗爲抗拒計我兵攻克之

諭曰養牛塘山梁地勢險要據奏情形雖係明亮等公同籌酌辦理而帶兵打仗自係額勒登保德楞泰二人親赴前敵督率進勦着各賞銀一千兩以示獎勵十二月逆首石柳鄧就殲詔封二等子爵加賞銀五千兩旋獲吳八月之子吳廷義并各首逆家屬

賞戴雙眼花翎二年正月移兵永綏擒斬張坪馬寨未降苗首石花延石花保麻普延隴長受等苗疆大功告竣二月奉

命偕明亮率川兵三千滇兵三千馳赴四川勦辦邪匪時總督

宜綿收復東鄉縣治賊首徐添德王三槐竄踞金峨寺明亮先結營馬耳峯緊逼賊巢德楞泰馳至合兵由冉家埡口奪險直前攻燬金峨寺殲賊無算獲大礮三十六鳥鎗刀矛軍械無算徐王等賊衆二萬又竄踞重石子香爐坪其南有分水嶺西南有火石嶺賊卡林立我兵分路奪嶺進攻王三槐率衆五千撲營德楞泰督兵敗之三槐中鎗逸獲其義父賀宗盛賊目鄭文禮五月德楞泰攻破重石子明亮亦攻破香爐坪殲萬計復追之于陳家壩精忠寺等處擒徐王二逆之母鎗斃傳教首惡孫

士鳳賊黨僅存千餘人會襄陽首逆齊王氏姚之富樊人傑等率衆二萬自楚入陝與徐王二逆合齊王氏姚之富稱黃號徐添德稱青號王三槐稱白號設掌櫃元帥先鋒總兵等僞稱屯開縣之南天洞溫陽井賊勢益熾我兵攻破南天洞賊分走雲陽萬縣雲陽教首高名貴糾衆數千欲與徐添德合德楞泰偕宜綿明亮等以計擒高名貴盡殲其衆于陳家山

優旨賞賚七月齊王氏等由奉節巫山東走楚境德楞泰明亮順江而下繞出宜昌兜勦賊復南趨德楞泰留明亮屯宜昌自趨荊州迎擊賊適攻遠安縣城解其圍

上嘉之八月賊犯荊門宜城偕明亮追擊至獨樹塘會東三省勁兵自北至合勦賊大潰荊門宜城得全是月賊欲北渡襄江竄河南德楞泰偵知東面楓樹埡西面耗子溝爲渡江要隘偕明亮分路追勦殺賊千餘擒僞副帥袁萬相劉登發等截賊回湖北得

旨賞用紫韁九月屢殲賊隊于房縣竹溪竹山境賊走陝境平利圖入川東大寧我兵敗之于樹河口殺賊數千馘僞元帥張

世虎僞副帥李得思等賊北走紫陽又合白號高均德股匪西走漢中十一月賊欲竄漢江北渡德楞泰飭副都統烏爾圖納遜率黑龍江官兵衝入江心擊殺甚衆截賊入川先是

上以齊王氏姚之富爲賊首中緊要之犯

諭令設法擒獲不必分心他處三年正月齊姚二逆竄聚廣元寧羌山中而高均德一股逕由南鄭渡江滋擾褒城德楞泰偕明亮奏言高逆北竄漢江以賊情而論齊姚爲各逆之魁自宜先籌勦辦以地勢而論高均德旣已渡江如東竄西安則與西安省會甚近是以臣等星夜帶兵由沔縣褒城馳抵漢中截勦酌留弁兵于寧羌沔縣防禦齊姚二逆北竄漢江之路

上以明亮德楞泰舍大股賊匪于不問輒帶全隊勁兵追勦高均德僅留弁兵數百名在後防堵茫無主見調度失宜

命拔去花翎革退世職紫韁並追前所賞銀五千兩入官時大兵方追高逆于城固洋縣齊王氏姚之富遂乘虛由石泉渡江與高逆合東走漢陰廳

上以德楞泰明亮二人厥罪惟均而節次所奏打仗情形皆係

德楞泰帶兵在前明亮不過在後接應。明亮職作爲領隊帶兵，仍責德楞泰偕宜綿上緊勦辦。三月窮追齊姚二逆，由山陽至鄖西，日行百七十餘里，擒獲千八百餘賊，三千衆踞鄖西三岔河，拒守我兵，盡殲之，獲賊目王如美、朱正聲等。齊王氏、姚之富均投崖死，奏入得。

旨嘉獎高均德由鎮安竄淮南，我兵敗之於兩岔河，斬白號僞元帥高大高二、藍號僞元帥宋大宋、三黃林高等餘賊，與李全、張添倫、股匪合五月，又敗之于五郎關。高均德、俄率衆自寧羌走廣元，合黃號龍紹周、藍號冉文儔各股二萬衆踞渠縣之大神山。

諭曰：德楞泰縱賊竄入川境，合夥迄未擒獲，一名種種遲緩，罪竟與明亮埒著革去御前侍衛內大臣都統，仍留副都統職銜以觀後效。七月，偕尙書惠齡將軍恒瑞攻克大神山左右賊卡，先後設伏斬三千餘級，賊衆將竄營山官兵燧之于黃渡河，斬級四千餘級，賊目禹斯珍、冉文宇等高均德、中箭逸，遂入營山縣之箕山，與羅其清、合羅其清者巴州白號首逆賊黨三萬餘結。

寨箕山徑圍百餘里東西北三面皆陡崖惟東南有路可通八月青號徐添德王登廷黃號樊人傑等逆踞鳳凰寺而箕山仍負固不下尋以副都統福寧查覈德楞泰所支軍需銀兩每月濫支四萬餘兩疊奉

嚴旨切責十月德楞泰等分三路進兵奪賊卡七賊寨六遂克箕山羅逆退踞太鵬山適額勒登保自闡中儀隴帶兵至軍合勦十一月賊以兩夜出寨劫我營卡德楞泰潛伏賊寨之南門四布雲梯乘間撲入火其寨額勒登保惠齡亦襲破西門殺賊四千殲羅其清之父羅從國尋合兵窮追其清于巴州方山坪擒之并獲其弟羅其書其秀子羅泳福等俘斬賊六千脫被脅難民數百得

旨賞還花翎四年正月冉文儔自箕山敗走至通江麻壩屯踞德楞泰偕惠齡及總兵朱射斗合兵進攻以元旦生擒冉文儔盡覆賊衆數千獲牛馬米糧旗幟軍械無算

賞頭等輕車都尉世職二月徐添德及白號賊冷添祿等股由墊江鄰水分竄涪州詐稱難民入鶴遊坪寨劫掠德楞泰馳至



偕額勒登保擊退之時四川總督勒保爲經略大臣奏言各路帶兵大員中額勒登保德楞泰尤爲知兵曉事因檄令德楞泰專勦徐添德大股尋追徐逆于開縣之大梁殲擒賊目李士貴趙興宗等三月徐逆自大寧北折入陝我兵追及于太平縣修基壩又遇龍紹周唐大信等股匪俘斬各數百脫被難民二千三百餘

上以其能遏賊竄陝嘉之嗣徐添德遁入大寧老山合龍紹周唐大信樊人傑龔建卜三聘張添倫辛聰各股我兵被其輾轉牽綴疊奉

嚴旨申飭七月諸賊被驅出山由奉節巫山東竄楚境線號首逆龔文玉亦自夔州八石坪踵至德楞泰分兵痛殲之追至竹谿大禾田又俘斬一千四百餘生擒龔文玉及賊目卜三聘李谷青僞元帥龔其位等

賞騎都尉世職八月勒保以賊衆犯楚被逮

命額勒登保爲經略大臣德楞泰督兵由房竹至興山截勦徐添德等股逼回川東擒賊目張世達旋緊躡張添倫辛聰等股

入陝楚境肅清十月高均德改名郝以智率高家營賊衆萬餘由白河至五塊石欲走西鄉窺伺漢江龍紹周冉添元等又率賊衆至放馬廠欲走紫陽德楞泰聞信督副都統賽沖阿溫春等馳回破放馬之廠賊卽由心子溪至大市川進勦高家營賊衆追殺百二十餘里擒高均德及黃號僞元帥王臨高僞先鋒閻慎卿閻慎雄秦學順斬藍號僞元帥曹明魁等俘均德至京師

諭曰德楞泰前因拏獲冉文儔賞給頭等輕車都尉嗣又生擒龔文玉加賞騎都尉世職例應并作三等男爵今着加一等賞給二等男爵授爲參贊大臣十一月進兵川北殲白號賊目張金魁于通江空水河擒僞總帥符曰明僞元帥王佐銀耿向榮于廣元野人村十二月追鮮大川苟文明股匪至川東賊矚大兵俱在川境遂先後入陝甘界滋擾五年正月德楞泰偕額勒登保分路馳詣秦州而藍號賊冉添元黃號賊徐萬富青號賊汪瀛線號賊陳得俸等三萬衆及白號賊張子聰麇向瑤雷世旺等二萬衆遽乘間由定遠竄渡嘉陵江西岸分擾南部鹽亭

西充各縣境總兵朱射斗歿于陣

諭曰川西重慶潼川各府地方蕃庶爲賊匪素所窺伺今一旦乘間竄往該處百姓又未築堡防守自必肆行焚掠朕心深爲憫惻寢食不寧德楞泰務須速赴川西合力勦除勿使賊匪蔓延二月冉逆等踞江油縣新店子德楞泰由武連驛間道追及賊分四路每路馬賊各四五百步賊各二三千迎戰我兵亦分路衝入賊巢副都統賽冲阿温春等突遇伏賊被圍德楞泰往援鏖戰一日餘殲賊無數重圍立解生擒賊首陳得俸上嘉其功授內大臣冉添元善用伏賊衆推爲主帥新店子之敗負箭傷遁三月連敗之于重華堰佛耳巖冉逆因伏賊深箐中誘我兵深入德楞泰察其奸密備前進遂痛殲賊衆于梓潼馬蹄岡火石埡一帶擒添德及僞總兵鮮其順等

諭曰德楞泰此次帶兵入川連獲勝仗今又五日四戰破賊奸計殲厥渠魁深堪嘉獎著加恩晉封三等子爵以示優眷兼

命署成都將軍是月大破賊股于劍州李家坪石門寨等處俘斬僞總兵李斌僞先鋒董廷華等賊衆三千脫難民一千三百

餘

命授御前侍衛俄白號賊張子聰度向瑤雷世旺等率衆由射洪縣王家背竄潼河西岸屯踞蓬溪分股攻圍成谷太和仁和仁義四民寨德楞泰率賽冲阿等輕騎追及痛殲之馘賊首雷世旺俘斬僞總兵吳學周等並分飭侍衛達勒精阿副將倭星額等援成谷太和等民寨圍始解奏入

諭曰前此德楞泰在李家坪等處將賊衆大加殲戮復跟踪追勦原冀前有潼河阻隔將賊匪逼投絕地以期一鼓殲除詎料該處河內船隻並未撤泊他處兵勇又不能實力堵禦以致騎馬之賊得以淌渡搶船竄過潼河西岸德楞泰帶兵踵至追擊未經渡河之步賊殲獲淹斃甚多並緊躡賊踪擒殄首逆要犯及大小頭目多名共殲賊一千三四百名獲賊及被脅難名一千三百餘名並救出四寨被圍之百姓一萬數千人實屬可嘉之至德楞泰爲國出力拯救良民旬日之間捷音連至自應再加懋賞用獎勤勞著晉封一等子實授成都將軍時四川總督魁倫以失守潼河逮問起勒保爲四川總督

命與德楞泰合兵勦賊四月白號藍號賊分擾遂寧安岳樂至各縣境並逼中江有趨成都之勢德楞泰偕勒保夾擊連敗之殲級數千賊始東竄邀擊之嘉陵江口陳家渡龔家灣等處俘斬及淹斃者又三千餘脫難民一千四百餘潼河兩岸肅清民心大定

上深嘉之以其子三等侍衛蘇冲阿陞授二等侍衛閏四月追賊至川東達州新寧各縣境殲藍號僞元帥劉君聘白號僞總兵苟文富等又殲僞軍師何上達于鄰水七孔溪賊敗竄川北會苟文明鮮大川樊人傑各股復由陝入川通江南江巴州各屬告警五月移師川北殲藍號白號賊目鮮中青賴掌櫃等六月賊走營山渠縣窺伺嘉陵江岸德楞泰截勦之于恩陽河尋與勒保合營追擊百餘里至岳池縣新場殲擒僞總兵吳耀國僞先鋒鮮文炳賊目苟文禮大掌櫃劉崇照總旗手張文元等及餘賊四千七月賊首鮮大川爲寨首鮮文芳誘斬苟文明以數百人遁時藍號賊屯聚南江廣元蒼溪界之九龍場肆擾德楞泰襲之殺賊千餘八月偕勒保合勦白號賊于東鄉太平境

白號旋與青號賊趙麻花合我兵扼之于茅坪倒流水擒斬賊二千殲偽副元帥湯思舉九月趙麻花復合大寧老林賊王珊欲向峽境迎徐添德股匪至川我兵由江口截勦至雲陽先後殲斃趙麻花王珊偽總兵何其信十月楚境黃白藍線四號賊股由房縣走夔巫一帶高家營賊衆及黃號龍紹周等股復由太平通江北竄兵至賊去兵去賊至樊人傑冉學勝王士虎王

月

綱賢再添士等股遂由川入陝徐添德一股又由陝入楚十二

諭曰樊人傑等卽係黃白藍線股內之賊前此由楚竄入川境德楞秦勒保曾奏明赴川東截勦乃並未上緊勦辦任此數股賊匪假道竄陝德楞秦旣不能在川勦淨卽當跟踪赴陝幫同勦捕方無畛域乃心存諉卸竟將大股賊衆委之陝省致竄漢江北岸額勒登保不能不移兵赴勦假令黃白藍線不逼入陝省則額勒登保在漢江南岸督辦徐添德等卽不能乘間竄楚是勦賊將有頭緒又因德楞秦堵勦不力致全局又形散漫德楞秦係一等子本應斥革姑念今春在嘉陵江以西勦賊尙爲

出力着加恩降爲一等男稍示薄懲是月藍號李炳白號楊開第黃號齊幗謨等賊衆八千窺伺嘉陵江德楞泰偕勒保合兵襲之于渠縣安仁溪又扼之于儀隴觀音河先後俘馘四千餘殲斃首逆楊開第齊幗謨僞副元帥馮中謙等

命賞給三等子並

御書福字賜之六年正月移師入陝會白號首逆高二自洵陽偷渡漢江圖入河南德楞泰追及之于山陽縣乾溪俘斬傳教首逆龔如一僞元帥閻慎珍等二千餘衆

命賞還一等子時高二亡命奔竄德楞泰探明賊踪乘雪夜窮追箭斃高二于野猪坪並擒僞先鋒王儒等

恩旨賞賚下部優敘並以其子蘇冲阿陞授頭等侍衛二月馳抵興安勦龍紹周股匪逼令西入川境龍逆率萬衆分前中後三營屯踞大寧長壩二郎壩等處我兵痛殲之馘賊二千擒僞總兵趙志成僞先鋒包萬才戴世榮等賊衆七百餘脫陝省難民千餘川省難民八百餘獲礮械旗幟驛馬甚夥奉

旨交部優敘三月龍逆遁湖北之竹山房縣又敗之仍走四川

太平縣老林德楞泰勒兵就興山截勦徐添德殄擒賊衆三千脫難民八百餘得

旨賞還雙眼花翎四月首逆徐添德合黃號賊樊人傑曾芝秀藍號賊陳朝觀龐士應等竄陝據白河縣黃石板分股圍天保萬安兩寨德楞泰派兵往援卽親率將弁直取黃石板賊巢擒龐士應及偽總兵方文魁蒲子榮陳添貴等馘賊二千陳朝觀尋亦就縛五月大破賊衆于西鄉獲徐樊二逆之妻徐添德由西鄉東趨紫陽德楞泰督賽冲阿温春等蹙之于仁和新灘大雨水漲添德溺斃奉

旨德楞泰交部優敘時龍紹周乘官兵追勦徐逆復糾衆闌入房竹一帶德楞泰仍督兵逼回太平先後殲擒偽元帥姜洪斌支茂乾偽先鋒陳文明偽總兵熊世金等并解散者凡數千衆八月追龍紹周至巫山巴東獲其妻子及偽軍師王鵬老教首李添棟斬偽元帥張添貴偽先鋒李盈等九月又擒龍紹周之兄紹海弟紹華龍逆僅以二百餘人遁德楞泰率賽冲阿温春等冒雨窮追十月遂殲龍紹周於平利岳家坪擒斬偽總兵胡



朝位曹應彪僞先鋒劉泗玉賴大魁等餘孽全數掃除

諭曰德楞泰自嘉慶四年以後節次殲擒首逆加恩遞封爲一等子賞還雙眼花翎本年又將徐添德龍紹周兩股劇賊全行殲滅厥功甚偉著加恩晉封二等伯並賞給黃面貂皮馬褂又諭德楞泰曾賞繼勇巴圖魯名號着仍照原賞名號封爲繼勇伯十一月偕勒保疏言四川重慶川北兩鎮所轄營汛界連陝楚自巫山以至廣元綿長二千餘里兩鎮駐劄較遠有鞭長莫及之勢請於太平營地方添設副將一員駐劄城內原設都司移駐城口通江縣屬之竹峪關廣元縣之黃楊堡大寧縣屬之徐家壩巫山縣屬之大昌等處地居萬山之中爲三省出入要路請各添設城堡設立守備一員各添兵二百五十名又達州爲教匪起事之地民俗刁悍撫治綦難請改達州直隸州爲知府改太平縣爲太平廳直隸同知卽以太平縣缺改爲府治附郭之達縣

上從之尋名府曰綏定十二月白號首逆苟文明糾合各股零匪西擾寧羌德楞泰馳赴廣元偕額勒登保夾擊賊遁回川北

大敗之于通江瓦山溪賊走開縣攻姚成壩糧臺德楞泰派兵馳救自率輕騎赴大寧斷其入楚之路七年正月苟逆又由川入陝偷越漢江北竄會川東零匪滋擾

上仍命德楞泰專辦川賊因奏言近來賊勢衰殘自苟逆外皆不成股數惟三五散行晝則改裝肆掠夜則四出摸樁致道路不通閭閻受害大兵一到又皆瓦解四散無迹可尋臣現擬由川楚交界之八石坪自東而西酌派將佐分爲多路或充團勇或充行旅或充難民或竟稱零匪或附于峒寨或藏于林壑改裝易服使賊驟見莫辨庶能到處殲除

諭曰此等機宜只期勦捕有益德楞泰可隨時酌辦朕亦不爲遙制也二月破線號餘匪于奉節縣鳳凰山斬僞元帥龔其堯擒教首李世漢李國珍父子僞總兵余佐志唐大高等又勦白號張長青股匪於雲陽大水田三月長青敗走開縣時黃號樊人傑藍號崔宗和胡明遠戴四通江藍號蒲添寶各股賊匪聚楚境之歸巴興房一帶德楞泰聞信卽移師入楚

諭曰德楞泰能統籌全局無分畛域且並不拘泥前次分界督

勦之旨帶兵遏楚正與朕意相合深得大臣公忠體國之道殊屬可嘉楚省賊匪中樊人傑積年老教最爲狡惡務須上緊設法將該逆速就殲除則餘匪自可漸次廓清亦可消伏而未起之患四月樊戴各逆由房縣至歸州欲合蒲添寶股匪德楞泰率精兵間道星馳三百餘里抵東湖霧渡河繞出賊前使不得合賊以四千人踞鷄公山我兵分兩路迎擊斬級五百擒僞先鋒劉應儒僞總兵熊方杰王洪桂等數百解散賊黨二千時蒲逆屯當陽河尙五千餘衆五月我兵分三路冒雨進攻殲賊八百擒僞總兵王元洪馬重禮等蒲逆以僞先鋒井英冉起才張揚苟大秀四人拒戰皆負創走又敗之于穆家溝魯家壩擒斬千餘賊勢殘敗德楞泰飭副都統色爾滾總兵蒲尙佐留勦蒲蒲仍自移師東趨探勦樊人傑冒雨入馬鹿坪大山出賊不意痛殲之樊逆竄至竹山平口河惶急投水死其妻子弟姪悉就獲樊人傑倡亂最久各逆僞封咸出其指揮至是全股掃蕩上偉其功晉封三等繼勇侯爵

上以軍務不日告竣

諭妥籌三省鄉勇七月奏言鄉勇之設起自臺灣嗣後平定苗疆及此次勦辦教匪均有招募元年二月間川省應募者有三十七萬之多陝楚兩省亦復不少陝之漢江川之嘉陵江楚之鄖西並三省邊界近山各屬其城守卡隘臺站有兵力不敷防範者不得不藉鄉勇爲協護用以禦賊卽使之自衛身家又可制其從賊之心其隨征鄉勇藉本地之人爲之哨探嚮導故進勦抄襲較爲便捷但不諳紀律不知進退每致失機償事是以川省節年裁汰已去三十五六萬偶有一二不法之徒臣與勒保先後奏明正法嚴辦至今帖然無事此臣親歷情形也現在三省征防鄉勇尙有一萬七千數百名事竣均須安插查三省現添營制應增兵額一萬餘名請將情願入伍者散于各營挨次補額作爲新兵其不願入伍者聽仍優加賞賚遣令回籍俟遣散後各處鄉勇寧謐然後再撤官兵

上是之是月蒲逆乘間劫我營卡將弁有被害者復輾轉奔竄于興房寧巫合黃藍白號餘匪增至一二千人德楞泰率色爾滾等奮力進勦斬獲過半八月窮追至竹溪瓦屋溝蒲逆墜崖

死奉

旨交部優敘尋

諭曰八月二十九日德爾吉行圍德楞泰之子蘇沖阿射蹇跪  
獻當卽賞穿黃馬褂蘇沖阿甫經挑在乾清門不過循分當差  
因念德楞泰在軍營帶兵勤勞懋著是以加恩伊子德楞泰當  
倍加感奮速成大功永受厚恩九月藍號崔胡戴四及青號熊  
翠熊方青陳侍學各股竄聚竹溪巴東興山老林德楞泰間道  
截勦擒熊翠妻孥及僞元帥張書紳漢等尋偕湖廣總督吳熊  
光奏請以次裁撤東三省各直省隨兵丁及豫省防江兵勇  
從之十月率總兵馬瑜副將呢瑪善等殲斃戴四于興山施家  
溝擒僞元帥趙鑑又擒陳侍學于巫山黃泡池并俘斬僞總兵  
李學進何從盛黃號僞先鋒何金堂等十一月殲斃熊翠于開  
縣銅盆溪其餘著名首逆亦多爲額勒登保兩路大兵殲除或  
被團練縛獻遂以十二月偕額勒登保等奏報大功戡定  
諭曰德楞泰前於平定苗疆時曾賞給子爵自授爲參贊後督  
率將士奮勇超倫所向克捷前後殲賊最多勳績炳然節經封

至三等侯爵著加恩晉封一等侯加太子太保銜賞用紫韁伊  
子蘇冲阿並賞給副都統職銜卽著齋送賞件前赴軍營看視  
額勒登保及伊父德楞泰用示眷念八年閏二月督兵至巫山  
大寧勦淨青號劉渣鬍子股匪四百餘衆又殲斃黃號曾芝秀  
于大寧漆樹梁四月入楚擒白號僞元帥冉璠于興山白果園  
擒藍號首逆于東湖黃柏舖五月擒老教首趙鑑之姪趙聰觀  
于巴東白家河六月奏請將湖北巴東竹溪房山分爲三段四  
川巫山大寧分爲兩段劃清疆界各派將弁排搜會哨以專責  
成

報可七月偕額勒登保會奏官兵勦捕餘匪全竣卽遵  
旨北上瞻覲

天顏

上慰悅下部優敘

命蘇冲阿親齋賞件迎交祇領八月至熱河  
行在

御製詩賜之曰

廟謨夙領久超羣屢典戎行勇略聞功著川中安萬姓名揚閩  
外冠三軍褒封特建千秋業受澤毋忘百戰勳福將來朝諸事  
定收寧遵路息紛紜

命在紫禁城騎馬九月解參贊大臣銜尋以陝省南山零匪煽  
動偷越漢江由西鄉入川

上以德楞泰係成都將軍令赴川督勦代額勒登保還京十二  
月遇賊于平利大橫山梁副將張應貴都司彭家棟戰沒賊黨  
內多有曾充鄉勇者我軍前敵鄉勇軍功首領魏忠才等請齎  
諭帖赴賊寨招降德楞泰許之已而忠才等七人俱被害

上以德楞泰不加搜勦意圖招撫致墮賊人奸計切責之九年

二月

賜額勒登保欽差大臣關防赴軍營會同督勦賊輾轉于川陝  
沿邊山內三月斃賊目大掌櫃苟文華僞元帥王振等于興隆  
坡賊鋒稍挫遁入老林四月

諭曰此起零匪德楞泰勦辦最久其貽誤之咎尤重著降爲二  
等侯革去內大臣紫韁降戴單眼花翎六月額勒登保以病解

欽差大臣關防移交德楞泰專辦尋率將弁楊遇春豐紳馬瑜田朝貴等痛勦賊衆于川陝交界之鳳凰寨殲擒僞元帥羅思蘭符廷伏李如玉周天良僞總管王宗福紀友亨蕭昌奉王仕奇得

旨賞還紫緡雙眼花翎時賊勢潰敗而首逆苟文潤仍率衆入化龍山老林抗拒八月軍功鄉勇趙洪周詣賊僞降乘間梟文潤首以獻餘匪竄老鴉絆經楊遇春伏兵截殺尋又斬獲大小頭目苟朝賢王添詔杜春陳勝魁等全股掃除先後奏入

賞還一等侯爵內大臣九月

諭曰上年七月間額勒登保德楞泰以成股之賊次第翦滅地方廓清當經馳報全捷嗣緣山內逃匿之匪三五成羣復行嘯聚自當趁大兵未撤之際嚴行搜捕以期淨絕根株特命額勒登保德楞泰先後接辦一年以來窮搜川陝一帶大山老林踪跡殆遍復將苟文華羅思蘭苟文潤及各號頭目僞總管等以次殲擒其夥匪皆悉數斬獲三省地方更無一名遺孽從此海宇敕寧永銷兵革可與率土蒼生共享昇平之福除額勒登保



現已遵旨起程回京外德楞泰著加恩再交部從優議敘十年六月奏會哨弁兵擊斃潛匿老林之首逆王世貴得

旨嘉獎八月額勒登保卒于京

上召德楞泰回京供職補正白旗領侍衛內大臣十月充方略館副總裁官十一月署鑲藍旗滿洲都統十一年三月以洋匪蔡牽犯臺灣

命赴閩督勦未至蔡逆遠竄仍奉

旨還京六月

命爲後扈大臣總理行營事務並管理兵部及健銳營事務七月寧陝鎮新兵陳達順陳先倫向貴等叛陷新舊城戕官劫餉尋攻陷洋縣走城固石泉鄂縣郿縣盩厔各境滋擾

命德楞泰爲欽差大臣馳往勦辦九月官兵分四路困之于兩河進口關及褒城留壩等處叛賊蒲大芳王文龍等棄械乞降縛獻首逆陳達順等三人磔于軍前並將願降賊衆及被裹難民四千餘收集一處分別辦理又截回在後拔營逃竄之遊匪千餘殲賊首朱有貴等五人奏入

上嘉其辦理迅速交部議敘尋奉

諭以叛賊窮蹙請命人數衆多自斷無概予駢誅之理然其情罪甚重除褻脅難民先行釋放外其從賊之犯仍當分別監禁請旨覈辦十月偕總督倭什布奏言散遣被脅難民三千八百餘名收繳長矛三千五百餘件其隨同滋事各營兵丁二百二十四名現擬遴選將弁分投管帶暫歸原營約束操防

諭曰所辦錯謬已極賊匪罪犯不赦卽因其畏罪乞降亦不過貸其一死已屬法外施恩豈有仍令各歸原營充當兵丁之理該叛賊等本由鄉勇充當新兵自作不靖今因其悔罪投誠毫無罪譴不但該匪等罔知儆畏且與各營守分官兵無所區別何以靖人心而肅軍紀德楞泰上次奏到時朕所降諭旨甚明自當候旨遵辦今率叛賊仍歸伍其膽大擅專尤出情理之外德楞泰著退去御前侍衛領侍衛內大臣管理兵部事務管圍大臣將上次所給議敘撤回交部議處尋

命補西安將軍部議請照溺職例革職

諭曰德楞泰擅將賊中投出之民人匪犯三千八百餘名悉予

資遣回籍此內并有各處軍流人犯曾經助賊抗拒者悉置不問甚至將曾充兵丁叛逆滋事之二百二十四名交與將弁帶管各回原籍約束操防其糊塗錯繆壞法養奸至于如此部議革職甚屬妥當姑念德楞泰前此勦辦邪匪有功特加恩改爲革職留任但此事非尋常錯誤可比仍俟八年無過方准開復十一月德楞泰會同總督全保巡撫方維甸奏請將降賊二百二十餘人與各處未動新兵三百餘名以新疆換防爲名分起調出凡係降賊頭目入于末起中途相機拏解到戍後撥給各回城爲奴

諭曰國家明罰勅法措正施行不值于此等頑愚馭之以術今旣以換防爲名莫若加恩卽令永作新疆回城戍兵不准換回將來亦不得再有陞擢以示懲創如稍不安分在彼滋事卽當從重辦理十二月偕方維甸疏陳寧陝等鎮營事宜一寧陝鎮始于嘉慶五年其時邪匪被官兵驅逐動輒竄入南山搜尋不易又因各路隨征鄉勇散遣難盡亟籌安插之法于是設立此鎮通管轄十營新兵六千八十名惟是各營相距遼濶究於統

轄非宜而總兵所管額兵多至六千餘名亦與營制未協請將留壩西江口一營改歸固原提督轄孝義營改歸陝安鎮轄並請裁減各營守兵二千二百四十名一南山內分汛弁兵及陝安興安分出各汛應分別酌留移併一漢中協存城兵丁無多請將銅廠營守備改爲漢中協守備所管兵二百歸併漢中府城一裁厚畛子守備請改爲陽平關營中軍守備裁留壩都司改爲略陽營中軍守備均令經理糧餉一寧陝陝安漢中各營新置營地應一體招佃收租一衙署兵房堡城量加添修毋庸全行建葢以節糜費下軍機大臣會同兵部議行十二年二月瓦石坪叛匪滋事德楞泰率將弁全數殲擒

上嘉之時兵部奏派輪閱營伍大員

命德楞泰查閱陝西四川二省尋奏請西鄉營瓦石坪汛改歸定遠城漁渡營轄以西鄉營遊擊改都司以漁渡營都司改遊擊得

旨允行十二月軍政屆期

上以陝省地方現極安輯德楞泰革職留任處分

特予開復十三年八月查閱四川營伍事竣回陝旋以病陳請暫緩年班

陛見

上允之十四年正月德楞泰舊病增劇

命其子蘇沖阿偕御醫馳赴西安看視

上親解佩囊並頒內府丸藥

賜之

特詔晉爵三等繼勇公三月卒

諭曰西安將軍三等公德楞泰秉志公忠素諳韜略宣勞闔外懋著威聲前於平定苗疆以後續經派令勦辦三省邪匪身先士卒所向有功百戰辛勤備嘗艱險本日接方維甸奏報德楞泰氣血久虧交三月後病勢日見沉重竟于初九日溘逝覽奏深爲軫惜著卽派乾清門侍衛內閣學士玉福馳驛迎至途中奠醢仍著步軍統領衙門探明德楞泰靈柩將至京師先于過西頂一二里外搭蓋棚座暫爲安置屆時朕親臨賜奠後再令入城治喪

命蘇冲阿襲封一等侯爵不必待年終查辦

諭頒廣儲司銀五千兩經理喪事照三等公例賜卹

予諡壯果四月

諭曰從前川楚陝三省教匪滋事額勒登保與德楞泰奉命出師其時額勒登保職司經略統握全機掃蕩么魔厥功甚偉是以于京城建設專祠用昭崇示德楞泰身爲參贊督勵戎行執馘殲渠戰功屢著而潼河一役于賊匪肆擾之際不避鋒鏑一鼓殲除生獲著名首惡保障川西數十萬生靈免遭蹂躪此其勳績之最著者至今川省士民猶爲感頌德楞泰雖功在額勒登保之次而蜀中賴其保全自當于該處省垣建立祠宇以安忠魂着勒保相度地基鳩工營造俾百姓中知感者得慰其瞻慕之忱卽或有不肖之徒震懾威靈亦可望而斂戢是月德楞泰柩至西頂

上親臨奠醴

命入祀昭忠祠

御製詩悼之曰將星隕落報秦州褒鄂繼亡挽不留日下共推

雙俊傑川中益著大謀猷至今三省無遺孽憶昔八年未解憂  
賜奠靈前和淚滴入祠晉爵舊勳酬子蘇冲阿襲侯爵現官正  
藍旗護軍統領鑲黃旗漢軍副都統

卷三十五





滿漢大臣列傳

卷三十六

豐紳濟倫

扎克塔爾

王林

明泰

富尼善

和興額

岱森保

豐紳濟倫富察氏鑲黃旗滿洲人祖一等忠勇公大學士傅恒父和碩額駙尙書福隆安自有傳豐紳濟倫于乾隆三十五年命在內廷行走四十年正月

諭曰額駙等向俱照公主封號授爲固倫額駙和碩額駙惟公主所生之子未經定例賞給品級于體制殊未允協嗣後在京公主所生之子至十三歲時係固倫公主所生卽給予伊父固倫額駙品級和碩公主所生卽給予伊父和碩額駙品級現在豐紳濟倫年已十三卽著賞給伊父和碩額駙福隆安品級著爲例三月從

幸盤山

賞穿黃馬褂四十五年二月授鑲黃旗漢軍副都統十月授奉宸苑卿四十九年十二月承襲一等忠勇公五十五年十月調

正白旗蒙古副都統兼管光祿寺事務五十六年五月調鑲白旗滿洲副都統十一月授正紅旗護軍統領五十八年四月授上駟院卿五十九年三月因誤差革去護軍統領四月調正紅旗滿洲副都統嘉慶四年正月授兵部右侍郎管理清漪園等處事務旋調戶部右侍郎二月轉左侍郎七月授總管內務府大臣崇文門正監督時

上令諸臣密舉所知豐紳濟倫保奏國子監祭酒法式善明白結實辦事妥協

上以法式善本年春間條奏荒謬且在祭酒任內聲名平常豐紳濟倫何以率行保舉

命大學士軍機大臣訊問具奏尋

諭曰豐紳濟倫濫保法式善並未深知法式善平日聲名才具僅以在伊家課讀從未向伊借貸一節卽以其爲人體面遽登薦牘實屬孟浪本應交部嚴議姑念其甫經辦理部務年輕未曾歷練且詢明尙無請託私弊著從寬交部議處部議降二級留任五年七月管理樂部事務八月授鑲紅旗漢軍都統

賜紫禁城騎馬時恭纂

高宗純皇帝實錄充副總裁官六年正月調正藍旗滿洲都統授鑾儀衛掌衛事二月陞兵部尙書十一月充會典館副總裁官

賞黑狐端罩七年四月充武英殿總裁官尋以漢文平常改派侍郎英和是月內務府大臣奏請裁減各衙門兼攝司員命將該大臣交部察議議上

諭曰前此豐紳濟倫召見時曾奏及伊係武英殿總裁于武英殿御書處司員不能管轄呼應不靈彼時朕卽覺其自滿矣茲據內務府衙門奏請將各處兼攝司員酌擬裁減內武英殿御書處並無內務府大臣兼管伊卽欲將兼攝司員裁減其有內務府大臣兼管之御船處咸安宮等處兼攝之員並未聲請酌減實屬偏私近于專擅是以降旨將該大臣等察議此事顯係豐紳濟倫一人主見衆人隨從附和部議降二級調用均屬咎所應得但念一時更換乏人豐紳濟倫著加恩改爲革職留任八年二月以川陝楚三省邪匪平定

恩予開復閏三月

上自燕郊駐蹕乾清門在散秩大臣上行走七月充文淵閣提舉閣事八月莊親王綿課等奏

裕陵隆恩殿工程尠朽查係乾隆十六十七兩年傅恒承辦三十五年福隆安賠修奉

旨豐紳濟倫係傅恒之孫福隆安之子所有伊現管職任著全行革退仍加恩賞留公爵又

諭將賞過之黃馬褂紫禁城騎馬俱著撤回仍加恩留戴花翎九月授頭等侍衛在乾清門行走十一月授鑲藍旗漢軍副都統十二月調正白旗漢軍副都統九年五月授馬蘭鎮總兵兼總管內務府大臣十年十二月失察大陡嶺青椿內外樹株被竊降頭等侍衛在大門上行走十一年正月復奉

命署馬蘭鎮總兵兼總管內務府大臣二月因

陵寢侍衛官房保固限內損壞

上以豐紳濟倫在任有年于侍衛等作踐官房並不實心查辦罰令賠修仍交部議處部議降三級調用三月

賞給四等侍衛仍在大門上行走五月因

派隨圍射布靶不到奉

旨查問旋經領侍衛內大臣面試步射奏稱豐紳濟倫手內無力不能將弓拽滿

諭曰豐紳濟倫係世家之子現正年壯爲何不能射箭著以公爵四等侍衛自備資斧前往盛京交將軍富俊教習富俊上

陵行禮帶伊同衆行禮凡遇查閱城卡行圍俱帶領操勞訓練八月擢盛京兵部侍郎十二年正月卒子富勒渾寧珠襲一等忠勇公現任頭等侍衛

扎克塔爾張氏原係四川番目乾隆三十五年隨征金川受傷擢外委洊升守備

賞戴花翎四十一年金川平經定西將軍阿桂保奏進京當差命隸內務府鑲黃旗滿洲四十二年授藍翎侍衛在乾清門行走四十四年超擢二等侍衛四十七年二月改入內務府正黃旗滿洲五十一年陞頭等侍衛五十三年擢

御前侍衛五十四年授正紅旗蒙古副都統兼奏事處行走嘉

慶四年八月

命隨工部尙書那彥成往陝西軍營十一月襄陽白號賊首高二馬五等由奏嶺老林竄田峪千峪澇峪扎克塔爾赴東河安溝一帶截勦至灰峪林擒斬多名十二月因川省賊匪竄近甘省

諭那彥成同恒瑞扎克塔爾率領勁兵速赴徽縣一帶堵截竄匪勿令深入甘境賊竄入五郎洋縣整屋境扎克塔爾偕總兵觀祥自小王湖至龍草坪逼勦五年正月隨那彥成副都統綸布春等馳至隴山鎮賊聚汪家山梁抵拒官兵分三路扎克塔爾由右綸布春由左合正路兵勇上攻斃賊二千二百餘名生擒僞副帥余禮等四名及餘匪七百餘名經那彥成奏入奉旨扎克塔爾著賞給瑚爾察巴圖魯名號並

賞玉搬指銀絲盒大小荷包二月襄陽黃號王廷詔白號楊開甲與辛聰辛斗等合夥經官兵兜勦南竄八里灣及牛蹄鎮屯紮扎克塔爾偕綸布春等勦前股賊匪後股賊匪上秀金山接應官兵搶過五層山梁而對面山梁大隊賊匪分三路抵拒扎

克塔爾帶兵壓下所騎馬爲賊戮傷倒而復起乘馬復戰賊始退奏入

上加恩陞授鑲白旗護軍統領尋因竄甘之賊向禮縣奔逃隨那彥成由柳家坡遏其北竄維時襄陽白號賊首張添倫等屯聚岷州之林江鋪經官兵左右衝擊由毛峪山追殺十餘里高馬二逆踞何家衢大山梁扎克塔爾隨那彥成擊退三月賊由宕昌南竄緊躡之賊至文縣界躡淺渡河攻卡狼寨扎克塔爾率兵勇于下游分渡至高礪下會齊官兵擊之賊退踞郭家山乘高下壓我兵分三路扎克塔爾由中路進攻賊潰殲斃馬五之子狗兒四月襄陽黃號賊首伍金柱等與楊開甲等合夥在分水嶺占踞三面山梁扎克塔爾與綸布春左右進攻又從嶺旁斜坡衝上鏖戰多時賊由鎮安兩河關竄逸復繞往東南截勦閏四月

上召那彥成還

命扎克塔爾等不必回京交額勒登保調派尋擊楊開甲等股匪于鄖西黃鶯鋪經略額勒登保奏入

諭曰楊開甲等股竄入楚境扎克塔爾繞道抄截在黃鶯鋪先  
後殲賊九百餘名生擒二百餘名扎克塔爾親身督戰尤爲出  
力可嘉著賞給恩騎尉世職以示獎勵嗣聞額勒登保追擊襄  
陽藍號賊首劉允恭于洵陽卽帶兵由大中溪之左山梁迎勦  
賊竄大中溪口經總兵楊遇春設伏敗之各路官兵兜勦追斬  
賊首劉允恭五月敗伍金柱股匪于手攀崖斃賊七百餘名奉  
旨交部議敘尋因賊匪奔漢陰廳銅錢窖卽率兵勇抄赴石子  
嘴與楊遇春等分路仰攻殲斃賊首龐洪勝及餘匪千餘名生  
擒五百餘名

賞玉喜字搬指大小荷包伍金柱奔五郎關袁家莊追斬百餘  
級楊開甲股匪復竄入洋縣茅坪扎克塔爾勦至七盤溝嶺用  
礮轟之追至茅坪殲斃首逆楊開甲大勝之復馳往大河壩四  
畝地攔截

諭曰此次擒渠獲勝係扎克塔爾等分路督兵奮力截擊得有  
此捷著交部從優議敘並

賞搬指大小荷包六月搜捕南山餘匪又由黃牛鋪直趨三岔



進勦竄甘之賊在東岔河曹家坪桃花溝一帶追及馬五張添  
倫等股匪斃賊四百餘名又抄截之于東河橋華林溝斃賊三  
百餘名馬五張添倫與伍金柱襄陽藍號冉學勝等合夥向渭  
河逃竄扎克塔爾從寬灘迎截勝之賊西趨棧道七月帶兵由  
黃牛鋪瓦房壩兩當迎截勦斃賊匪九十餘名隨額勒登保從  
大川壩大石山等處杜賊折竄東北八月楊遇春等迎勦張添  
倫股匪扎克塔爾在木瓜園鄧子園策應旋聞賊首伍金柱在  
石觀子溝爲官軍鎗斃餘匪東竄卽由徽縣馳赴杏樹灣攔截  
上以高二馬五戴家營等股賊匪勢甚鴟張

命額勒登保帶領扎克塔爾速行回陝上緊勦除尋偕總兵慶  
成駐劄褒城之新集又由南鄭移駐西鄉兼顧川楚竄匪九月  
偕慶成分路攻川省竄匪于罐子山擒獲多名復駐城固二郎  
壩拒川匪折竄漢南旋因賊擾紫陽安康仍移駐西鄉  
上以額勒登保等勦辦賊匪俱屬認真可嘉

賞扎克塔爾捨狝馬褂尋擊賊於安康小道河鐵爐壩生擒  
劉世富等十六名十一月攻高馬二股匪于棗樹嶺山梁斃賊

三百餘名遂由金嶺子前進探得高馬等匪竄向紫陽巴州白號苟文明等匪在安康之陷河出沒有由西鄉漁壩街渡江者卽隨額勒登保取道安康渡江北馳勦又出子午峪大峪入藍田商州自北向東兜勦十二月行抵商州聞襄陽黃號樊人傑等股匪在包和鋪峒峪口西溝有奔黑山向東之勢馳往攔勦將賊截向西南旋隨額勒登保由液村澇峪口劉家莊緊顧東北而進探知冉學勝股匪仍欲向東卽由梅花鋪向西南抄截西抵龍王溝高馬股匪折回漢王城東竄距獅子梁扎克塔爾抄路衝擊用礮轟之賊退六年正月抄赴五郎坪遇賊奮擊追勦四十餘里殲斃四百餘名生擒二百餘名

上以額勒登保督率扎克塔爾等于新正元旦奮擊乘勝追躡實屬不遺餘力嘉之尋隨額勒登保取道竹壩追勦高馬等匪進抵四畝地並探勦冉學勝等股匪二月在火地東嶽殿控扼搜捕尋由沙坪獅子坪追擊襄陽黃號伍懷志股匪賊竄光頭山橫截之于瓦子溝獲教頭彭九臯復隨額勒登保從石泉過江赴西鄉勦辦漢南賊匪三月迎勦高馬後股之賊于司渡河

及潘家梁五郎壩等處聞川匪通江藍號陳朝觀等由細辛壩北竄出陝境雙泉子卽冒雨窮追至車灣坪殲斃百數十名折行數十里遇賊匪正與官兵抵拒馳馬衝擊賊潰

上嘉之偵知襄陽白號高三及馬五等股匪合竄南鄭遂馳抵狼渡礮適遇賊匪下山攻撲民硿卽率兵勇左右進擊躍馬橫衝將賊截爲兩段生擒賊首王凌高仍率副將楊芳由簡池壩追勦得

旨褒獎尋因冉學勝股匪在棧道出沒調赴棧道勦捕抵留壩賊竄東倉溝卽隨額勒登保由唐藏進勦至隴州草白峪賊匪進溝向東北竄隨率馬隊順溝進發遇賊騎從溝岔突出迎擊之與額勒登保合攻賊潰高三馬五經楊遇春生擒復分投搜捕四月由水磨川馬峽口白沔河一帶抄截冉學勝股匪賊竄洋縣追擊過江夜襲賊營于黃安壩賊驚竄擒斬多名五月冉逆竄入紫陽界與楊遇春分路追勦賊於天池山設伏扎克塔爾等分三路進抵半山賊從山凹突出兵勇搶占山梁斃賊三百餘名生擒僞副元帥陳學文及餘匪五十名賊由木蓮橋硿

河分竄復與楊遇春取道深水河向磚坪抄截追獲賊匪多名至白土關賊由洵陽金河等處偷越入楚與楊遇春抄至竹溪兜擊復截之于草鞋埡賊仍向陝境奔逸尋由鶯嘴山大金河口前進襄陽白號張添倫楊開甲餘黨黃號姚馨佐曾芝秀等股合聚于高唐嶺劉家河口一帶扎克塔爾與楊遇春分兵冒雨搶攻山梁奮勇擊之賊敗斬馘四百餘生擒五百餘名奉

旨交部議敘並

賞搬指大小荷包冉學勝股匪由湖北折竄白河與姚馨佐等合夥扎克塔爾偕楊遇春攻之于孫家坡復擊之于渭子池山梁斬獲無算遂分兵赴陝秧田壩勦辦餘匪

諭曰此次額勒登保督飭扎克塔爾楊遇春等分路截勦斬獲多名扎克塔爾楊遇春均屬奮勇特將朕佩帶之搬指荷包等件分賜伊等祇領如朕親授以示格外恩眷嗣將秧田壩賊匪殲除白河境內肅清六月參贊大臣德楞泰追勦太平黃號龍紹周及襄陽藍號戴四崔宗和胡明遠等竄匪至陝楚交界之關埡子扎克塔爾由竹溪之龍王埡等處緊顧東面兜截至牛

皮溝分路進勦擒獲多名至湖溪溝戴四向散子坪西竄七月  
隨額勒登保自竹葉關曾家壩向西探勦尋因陝省各股賊匪  
陸續入川額勒登保奏擬率扎克塔爾等由玉子坪班鳩關界  
嶺前赴川境奉

旨不必以入川爲急總須帶領官兵顧住陝省邊界徐徐前進  
八月抵涼橋張添倫姚馨佐等股匪乘夜撲營率兵擊之鎗箭  
並發賊退跟蹤進擊賊奔紅洋河由五塊石埡山下竄復擊另  
股賊匪于瓦廠坪擒斬多名尋由簡池壩三元壩進在西鄉通  
江太平一路勦辦九月

諭將吉林黑龍江受傷患病官兵先行撤回額勒登保奏派扎  
克塔爾往西安專司彈壓十月由西鄉回營行抵中壩截擊通  
江藍號李彬分股竄匪于栗壩十一月由蒙壩塘柳林溪向西  
偵探聞姚馨佐股匪在南江分水嶺圍逼民洞率兵勇分投衝  
殺又擊襄陽黃號辛聰股匪于木竹埡追至韭菜巖丁家溝屢  
有斬獲尋由沙壩碑壩進探知苟文明股匪由廣元竄階州隨  
額勒登保由南鄭抵褒城新集駐劄十二月進抵寧羌苟逆竄

入通江隨于大河口城隍廟一帶緊顧北面又由官渡進勦東鄉白號劉朝選股匪于王家坪七年正月兜勦李彬股匪于潔藻河姚家壩聞苟逆奔莞豆坡川北鎮總兵薛大烈緊躡其後遂由白沔峽抄截擊之于七星壩江岸又敗之于迎風壩復由梅子鋪大河口迎擊二月賊竄入秦嶺遂同額勒登保在栗子華陽壩一帶顧定西南截擊苟逆竄黃柏園跟踪至牛尾河賊折入老林向太白河西竄尋由斜峪關入辛峪口進擊苟逆入高梁老林復分路追勦賊翻過太白梁出楊泗廟向東南遁三月由玳瑁河抄截至三官廟又截之于九尺壩賊匿月亮坪由水磨溝火地奔竄率兵追勦多所擒獲賊竄過秦嶺北奔復緊躡之至泥河口轟擊之賊入紅水河抄赴秦嶺北面峪口截勦賊入太白山東北老林扎克塔爾等拔營誘之使出擊走之竄蓮花寨復帶兵乘夜馳至殲斃多名賊竄碾道狄木菴又由東嶽廟跟追賊由黃草坡東河杜家墳奔竄馳抵小王湖夜襲之賊四散仍緊躡賊蹤抄出洵陽壩四月偕楊遇春追至鎮安石門溝賊踞山梁抵拒我兵奮力衝擊賊潰乘勝追殺斃賊百數

十名生擒數十名追過腰竹

上嘉之賊入整屋寧陝老林偕楊遇春由西北向東南兜勦逼出老林追擊之于鎮安譚家山上板房連次擒斬多名賊向東峪河狂奔

諭乘勝掩擊就地殲除不可再任折回山內賊竄茨溝與官兵遇迎擊之追至油房溝賊偷撲營卡擊退之乘勝掩殺至腰竹溪分路向南逼勦斬獲頗多又擊之于正灣鋪鐵銅溝賊遁入五大谷八大谷密林復東竄截擊之由琵琶嶺金鷄河至兩河顧住北面向西截勦賊奔小王澗率官兵自安溝冒雨迎截之復分路兜擊賊由七里溝竄上秦嶺旋偵得賊匪在韭菜坪老林屯聚遂由西面獅子坪甘家碛兜圍五月追至徐家壩繞赴金鷄梁由西面進勦賊竄苟家溝又由廓溝石板溝進勦追至傅家河口復由兩河菜子坪追勦時因賊匪未能殲盡

諭曰扎克塔爾本係番目留京供職擢至御前侍衛派往軍營因其打仗出力授爲護軍統領專辦苟逆一股乃曠日持久並不上緊設法搜勦本應卽予革職治罪姑念平日尙知奮勉加

恩暫予革職留任以觀後效嗣探知苟逆在磨子溝藏匿偕楊  
遇春分兵躡之賊踰光頭山竄入傅家河老林尋截分股賊匪  
于華陽苟文明股匪遁黑圪塔又抄截之于四畝地旋因苟逆  
折向東面額勒登保調扎克塔爾向東南進勦偕楊芳合擊苟  
逆分股賊匪靳士黃陳文海等于華陽月亮坪時因額勒登保  
拏獲苟文明妻羅氏子苟三皮子等奉

旨扎克塔爾亦著加恩准予開復六月靳士黃等分股竄桃統  
二川扎克塔爾出辛口峪進斜峪關馳勦賊由方柴關西竄率  
兵在白雲峽五里坡扼住東北面攔截設伏擊之於斜峪關又  
由佛爺坪進兵多所擒斬苟文明經額勒登保殲斃七月靳逆  
竄火燒營扎克塔爾偕楊芳分投截勦賊由沙窩子西竄整屋  
復入秦嶺八月偕副將張瑗搜捕屢有斬獲

上嘉之

命額勒登保取道平利赴楚勦辦楚省餘匪九月楚匪竄入洵  
陽白河境內卽率兵勇由黃洋河迎擊進抵白土關又派往七  
里關追勦復隨額勒登保在平安交界嚴密搜防十月追藍黃



各號竄匪至杏兒坪劉家坪豐溪鍋邊河賊竄入大寧境駐劄  
虎溪山防之時陝楚邊界已就肅清各賊匪被勦俱入川境扎  
克塔爾隨額勒登保由獅子壩取道紫陽茅壩關入太平境聞  
賊竄漆陽坪卽由銀珠壩瓦房店倍道馳勦十一月賊奔甘龍  
礮迎勦之于苦草壩擊伏匿零匪于大凹塘老林斃賊多名生  
擒何正相等十六名復從堡坪進勦旋以陝境餘匪未淨

諭額勒登保先派扎克塔爾帶兵協勦八年正月由茅埡塘向  
箭桿山前進賊奔通江復躡蹤入川截勦由小溪石鼓夜擊之  
于佛頭山直搗龍池場賊屯擒獲多名復馬家壩馳勦餘匪匿  
巴山老林由倒水硎苦提河跟蹤搜捕多所擒獲二月回京  
命仍在奏事處領班行走閏二月因拏獲逆犯陳德于神武門  
內奉

旨賞給三等男爵其恩騎尉世職仍照舊兼襲七月三省大功  
全竣

命交部議敘十年十一月因外奏事聽差賀清泰壓遞奏摺  
諭曰外奏事官員本不應設有聽差之人且賀清泰竟敢在外

擅壓奏摺毫無覺察扎克塔爾著交部嚴加議處並

命斥退外奏事差使回本任供職聽候部議十二月部議降一

級調用

上以係屬領班且前在軍營出力著加恩降二級留任十一年

二月洋匪蔡牽滋擾臺灣

上命領侍衛內大臣德楞泰爲欽差大臣同扎克塔爾馳驛往  
勦旋因蔡牽遠竄奉

旨還京七月因寧陝鎮新兵陳達順等滋事隨德楞泰赴陝勦  
辦九月取道洋縣盩厔一帶探蹤進勦在斜峪關迎頭截殺斃  
賊百餘名生擒僞先鋒彭貴等十二名夥賊四十六名傷僞元  
帥蒲大芳尋遇賊于方柴關被圍蒲大芳及賊目王文龍等縛  
首逆陳達順陳先倫向貴率衆乞降奉

旨交部議敘

上以德楞泰奏賊匪震懾軍威窮蹙乞降扎克塔爾等一戰得  
勝卽將首逆縛獻殊不足信恐有別項情節德楞泰復奏扎克  
塔爾帶兵至方柴關與賊鏖戰因賊數衆多官兵四散扎克塔

爾被圍正在危急之際適蒲大芳王文龍等率衆趕至棄矛跪哭乞降並非賊匪窮蹙乞降

上召見扎克塔爾

親加詢問祇稱賊匪畏罪請降並未將方柴關兵散被圍各情奏明復經德楞泰詳悉具奏

上令軍機大臣傳訊扎克塔爾始據實陳奏

上以扎克塔爾前此掩飾之咎實無可辭著退出御前侍衛在乾清門侍衛上行走仍交部嚴加議處並前此議敘俱著註銷十一月部議照有意隱諱例革職

諭曰扎克塔爾隨德楞泰勦辦寧陝叛賊派在前敵賊匪由斜峪關南竄同楊遇春痛加勦殺殲獲多名迨追至方柴關遇成隊賊匪天晚官兵轉戰力疲被賊衝壓數次致有散失扎克塔爾同楊遇春帶領親隨數十人至該處營汛駐守賊匪正在四面圍繞之際而溫春等帶領東三省馬隊適至賊匪畏懼賊首蒲大芳王文龍等率賊衆至扎克塔爾楊遇春馬前棄械投誠扎克塔爾等諭以如果實在投誠可將首逆縛獻蒲大芳等立

將首逆陳達順陳先倫向貴三人縛獻一面令賊停紮一面稟知德楞泰定奪扎克塔爾于到京時經朕面加詢問祇稱賊匪畏罪請降迨德楞泰奏到詳細情形復令傳訊始行陳出實情是扎克塔爾于方柴關受降情節不行詳細備陳意存隱匿諱敗爲勝仍染軍營惡習不以誠實對君上獲咎實在於此扎克塔爾係川省番目出身平素當差尙屬勤慎自應量加寬賞著退出乾清門侍衛鑲白旗護軍統領正紅旗蒙古副都統加恩仍留三等男爵及恩騎尉世職仍賞戴花翎著卽回伊本省四川地方交與總督勒保以副將補用觀其後效尋

賞副都統銜授科布多參贊大臣十二月

命仍入內務府正黃旗滿洲十二年十一月奏請將科布多屯田人等分別獎賞

從之十二月授正藍旗漢軍副都統十三年十一月奉

命回京十四年十二月授鑲藍旗護軍統領十五年仍在奏事處領班行走十六年正月調正黃旗護軍統領十七年正月授武備院卿四月卒

諭曰扎克塔爾本係川省熟番從征金川軍營打仗受傷來京當差行走多年並曾出師川陝隨同勦辦邪匪著有勞績茲聞溘逝殊堪軫惜著賞銀二百兩照護軍統領之例議卹其任內應得處分均予開復子常安襲三等男爵兼恩騎尉現任三等侍衛

王林正紅旗漢軍人由閒散於乾隆三十五年補授鑾儀衛整儀尉三十六年陞治儀正四十年擢雲麾使四十二年授廣東提標後營參將五十年陞廣西梧州協副將五十三年擢右江鎮總兵五十七年調左江鎮總兵嘉慶二年四月西隆州所屬村寨多被苗匪勾結遊擊特通額駐守八渡卡賊由粵岸山後轟至北岸狎匪乘間擁衆過江助之特通額受傷林駐守西隆舊城相距二十餘里聞信帶兵馳救行不數里卽遇匪衆萬餘我兵奮勇抵擊斃賊百餘名林右臂有鎗傷經兩廣總督吉慶奏入

賞戴花翎六月進攻亞稿賊巢行至上下憂雄苗匪千餘迎拒林偕副都統和星額等分兵三路攻撲直搗賊巢鎗礮並發擊

斃苗匪六百餘名復從小路繞至亞稿之後分三路壓攻林等由東面進和星額等由西面進提督彭承堯由山梁壓下各兵拋擲火彈焚其寨屋一面施放鎗礮擊斃賊匪千餘我兵一擁而入生擒六十九名餘匪突烟冒火而出死者甚多亞稿賊巢全行掃蕩奏入

賞玉喜字搬指黃緞火鑷包大小荷包尋搜勦賊首龍登連於附近亞稿之那地等處分路進攻賊將隘口三處砍樹排柵復壘石牆固守和星額等由東柵進彭承堯等由西柵進林隨吉慶攻其北柵另派員弁搶據寨頂拋擲火毬火彈焚其寨中房屋三路官兵乘勢砍柵搶入刀矛並舉立斃賊匪二百餘名追殺數百名八芒弄深官塘憂貴憂農巖隘苗人千餘戶赴營投誠吉慶旋派林于西隆州城之西者浪地方搜捕閏六月勦周洞村率參將劉榮慶等帶兵八百名乘夜冒雨搶上山梁鎗礮齊發匪衆千餘出村抵拒我兵奮攻擊斃百餘名賊始退林等斬關直入殲斃無算追擒匪目王亞平七月在軍營受瘴病卒明泰吳扎庫氏鑲紅旗滿洲人乾隆三十五年二月由健銳營

前鋒擢護軍校八月升委護軍參領三十六年十一月授副護軍參領三十八年隨征金川有功

賞戴花翎四十年九月授陝西漢鳳營參將四十一年九月擢潼關協副將尋調浙江金華協副將四十九年四月因親老呈請回旗十二月補嚮導處護軍參領五十九年授江寧城守營副將六十年二月

命訪拏逆匪劉之協尋緝獲李榮等匪八月擢直隸正定鎮總兵嘉慶元年楚省教匪滋事延及豫境直隸總督梁肯堂恐賊匪擾至直界令明泰不露聲色妥爲彈壓九月湖北教匪擾至豫省滹河鎮復往東北竄逸

上命明泰于附近營分抽撥勁兵二千速赴滹河鎮東北一帶唐縣交界地方迎頭勦截十一月楚省賊匪西竄欲奔光化明泰偕烏魯木齊都統永保等帶兵自賊之東南兜勦尋由蠻張家集進併力夾擊賊敗竄追殺二十餘里殲斃一千餘名餘匪潛向上薛家集吳家集分屯十二月西安將軍恒瑞等進攻吳家集明泰等分勦上薛家集賊悉力抗拒我兵奮擊賊敗走殲

斃千餘名燒燬賊屯七處賊向黃龍塢奔竄明泰等駐劄王家河潘家臺等處堵禦賊分竄二年正月官兵分三路勦捕明泰駐劄安石一帶截賊北竄之路賊分兩股潛逃明泰偕護軍統領阿爾薩郎等帶兵二千向東北一路分投勦捕殲斃甚夥生擒二百餘名並拏獲賊首劉起榮解京經湖北巡撫惠齡等奏入

上嘉之

賞金盒銀絲盒大小荷包二月賊由洛陽店均川等處逃竄明泰帶兵迎勦至官潭日暮將劄營賊從山後蜂擁撲犯左右圍裹明泰分兩翼擊勦奮力向前殺死多賊身受矛傷甚重

上傳諭惠齡等曰總兵明泰打仗受傷曾否痊愈著附便覆奏八月

諭曰惠齡奏明泰左腿受傷至今未愈准其回旗調理七年二月傷愈補頭等侍衛十二年二月擢鑲白旗蒙古副都統十一月授江西贛南鎮總兵十六年五月

陞見補鑲黃旗漢軍副都統六月兼管火器營事務十一月因



領侍衛內大臣帶領引

見人員明泰錯跪經

御前大臣參奏

上以明泰年老衰頹

命原品休致仍

恩賞副都統全俸十九年十一月卒子廓仁阿理藩院學習行走主事

富尼善滿洲鑲紅旗人富察氏漕運總督富顯之子富顯以乾隆三十四年隨大學士傅恒征緬甸在野牛壩造船病歿奉

旨富顯之子著帶領引見時富尼善年幼不通清語

命在咸安宮學習食額外主事半俸泊三載爛習乾隆三十

八年授戶部主事軍機章京上行走旋擢員外郎四十八年授

贛州府知府五十年擢天津道五十一年調熱河道五十二年

陞直隸按察使五十四年二月署直隸布政使六月以

頒賞沙瑪爾巴呼圖克圖物件途中途遺失議處十月陞安徽

布政使五十五年以直隸建昌縣盜犯馬十案承讞遲延奉

旨富尼善係直隸臬司且曾任熱河道建昌縣是其所屬此案係伊任內之事乃以劫盜重情一任懸宕多年置不速結非尋常疎忽可比富尼善著即解任來京又奉

旨富尼善于馬十之案既經提犯到省僅派委員辦理以政輾轉宕延其咎甚重該員經朕不次遷擢乃于劫盜任聽玩延殊爲溺職富尼善著革職拏問旋

賞頭等侍衛銜赴烏什辦事六十年正月授京口副都統十月以母老留京授鑲紅旗蒙古副都統嘉慶二年三月調正白旗滿洲副都統十月授密雲副都統三年調寧古塔副都統疏言寧古塔官地自乾隆四十八年以後三遇水雹霜災兵丁無力耕種猶按年交納錢糧實爲兵累請將此項地畝撥給有力無地民戶耕種俾得課項有著旗人不致受無地之累奉

旨下部議行五年十二月奉

旨富尼善奏請伊母年逾七旬不服水土常染患病著將任內諸物交代來京六年到京署鑲紅旗蒙古副都統授鑲藍旗蒙古副都統七年二月赴喀拉沁查辦事件五月署正白旗滿洲

副都統六月雲南巡撫孫曰秉奏貴州糧道孫文煥差人呈控  
事件奉

命偕侍郎初彭齡查辦途次奉

上諭貴州巡撫印務富尼善暫行署理案內各員應得罪名初  
彭齡富尼善嚴訊定擬旋與彭齡奏孫文煥所控不能指實藩  
司百齡非苛索入己惟巡撫常明久任黔藩輒將軍需欸項索  
混支抵署藩司張長庚接收常明交代因循貽誤均請

旨革訊貴西道呂雲棟於應撥廠銀代常明擔認候補道馮克  
鞏與孫文煥同在廠局經手亦應革訊

上從之尋授貴州巡撫九月卒子慶安現官刑部河南司主事  
和興額滿洲鑲白旗人葛濟勒氏父永昌襲雲騎尉世職和興  
額初以烏鎗護軍從將軍公明瑞出師甸緬有戰功乾隆三十  
六年授烏鎗藍翎長隨領隊大臣莽拉察征金川右臂中烏鎗  
傷受

優賞四十年授烏鎗護軍校四十二年襲雲騎尉四十四年擢  
陝西西安佐領四十六年大學士公阿桂征撒拉爾逆回西安

將軍伍彌泰令率兵往隸既至蘭州從副都統海蘭察進攻華  
林山奪取龍尾山梁殲賊甚衆奉

旨賞戴花翎加佛爾卿額巴圖魯名號並加協領銜四十七年  
晉授協領四十九年逆回田五又叛將軍傅玉令偕遊擊高人  
傑率兵擊賊于西山頂大敗之時官軍盡銳逼逆回于石峯堡  
總兵蘇靈與和興額俱督兵奮勇爭先右臂復中矢石傷得

旨獎賞五十三年擢廣州右翼副都統五十四年以私收衙署  
餘屋租銀鑄一級調用旋授頭等侍衛爲巴里坤領隊大臣六  
十年復擢廣州左翼副都統嘉慶二年黔苗滋事擾廣西之西  
隆州總督吉慶以和興額屢經出師熟悉行陣奏調協勦先經  
敗賊於憂雄殲獲甚衆並得其器械輜重時逆苗於亞稿其山  
徑逼仄多溝坎賊復深掘設伏軍不得進吉慶與和興額偵得  
深箐中小路一綫可繞出其後乃分兵進攻和興額由西面夾  
擊殲賊無遺奏入

恩賞玉搬指火鑷包大小荷包等件又攻賊于那地者浪諸處  
俱斃之西隆州境平復從吉慶圍賊於巖場寨降其民戮黔苗

數百人遂進軍紅水江夜渡江天明至八渡與諸軍會合殲賊二千餘人再進至板峰由板峰至板階伏兵山下五鼓賊至俟其過半突擊之斃賊無算再進至册亨分路搜勦州城圍解黔苗遂平疊次事

聞皆奉

獎賜三年調涼州副都統五年川楚教匪蔓及陝省總督長麟奏令督軍赴陝西邊界防堵初駐軍紅花鋪旋移軍斜峪關復移軍高關時冉學勝張世龍伍金柱各股賊匪俱由辛峪竄出和興額未能截勦奉

旨革巴圖魯名號拔花翎貶秩爲防禦隨營自贖會賊匪竄至沔縣之乾溝河設伏以誘官軍長麟令和興額往擊之分軍三路盡殲其伏奉

旨授佐領遇缺卽補六年賊匪樊人傑將由黑河西竄截賊于五丁關斃賊四百餘名生擒六十餘人奪驛馬器械甚衆方截賊至大路時和興額手及三賊用力過猛右臂舊創復裂得優旨賞給協領銜遇缺卽補時留壩逆匪冉學勝屯聚大壩偕

總兵楊奎猷督軍勦之以五十騎超衆而前遇伏失利沒於陣  
恩旨照副都統例議卹制子福格襲騎都尉又一雲騎尉世職  
現任江南松江左營遊擊

岱森保滿洲正紅旗人庫雅拉闊綽里氏乾隆三十六年由粘  
竿處拜唐阿從征緬甸三十七年移師金川十月授藍翎侍衛  
旋

賞戴花翎三十八年五月隨將軍溫福參贊海蘭察于昔嶺攻  
勦賊番擲放鎗石嶺上賊番迤邐而下以巨礮擊散奮勇被傷  
授三等侍衛三十九年三月與賊番戰于羅博瓦殲賊三十餘  
名七月攻取喀木喇瑪山礮領巴圖魯兵丁首先衝入殺散賊  
匪奪獲礮座奉

旨褒獎擢二等侍衛

賞給布隆巴圖魯名號四十年二月帶兵攻勒吉爾博山梁等  
處木城卡三十餘拔開鹿角躍進濠溝以火彈拋礮頂破之八  
月隨將軍阿桂攻勒烏圖礮寨礮摧橋座據第八層高勘仍潛  
通地道以接拿木柵復於攻得木城後併力進勦遂破賊巢九

月授頭等侍衛四十一年大功告竣凱旋後

賞賚甚優圖像于紫光閣

命詞臣擬平定金川後五十功臣像贊岱森保得贊曰掘地拿  
柵出賊不意合攻勒圍呼聲動地戰羅博瓦不顧傷胸遇敵勇  
敢錫號布隆四十四年授護軍參領五十二年臺灣逆匪林爽  
文莊大田等糾衆滋事六月與侍衛烏什哈達等于府城大北  
門沙嵌下截殺賊夥行至蔦松齊力奮擊賊不及防死者約二  
百餘人八月復帶弁兵迎擊南潭中州賊匪以巨礮斃五六十  
人賊退仍帶本隊弁兵及各處義民前赴南潭五六千人以排  
鎗壓之賊大潰火焚賊寨數百餘賊分竄九月復敗賊於府城  
北之三坎店奪獲礮械尋隨閩浙總督常青福州將軍恒瑞江  
寧將軍永慶廣東副都統博清額赴援諸羅仍由水道赴鹽水  
港屢著勞績十一月以鹽水港之後勦賊奮勇奏入

賞加副都統職銜五十三年二月復隨陝甘總督福康安等攻  
賊於牛莊賊恃灣裏溪水深溜急排列迎拒官兵突過深溪斬  
俘甚衆乘勝直抵南潭三月莊大田等被獲全部平定凱旋後

署正白旗蒙古副都統

上命于紫光閣紀勳圖像復

命詞臣擬平臺灣後三十功臣像贊岱森保得贊曰初至著績  
鹽水港營移師南路爰靖海鯨率先鼓勇有將提兵牛莊深入  
克壯軍聲十一月補正黃旗蒙古副都統五十五年授伊犁領  
隊大臣五十六年八月前藏廓爾喀頭人滋事佔據聶拉木  
上命帶索倫達呼爾兵一千名同參贊海蘭察由京至青海草  
地赴藏會同兩廣總督福康安四川總督惠齡等協力征勦五  
十七年正月官兵行抵西寧迅速前進于三月抵西藏六月福  
康安派同成都將軍成德帶兵三千前赴聶拉木牽綴賊勢遂  
于措克沙木派屯弁領屯土兵丁由夾河兩面前進復親率屯  
弁帶兵由正路直趨據德親鼎山攻克頭卡後復直前攻撲斃  
賊數十人餘俱敗竄奏入得

旨奮勇可嘉七月偕侍衛永德由哈那袞木山往扎木一路進  
攻賊卡奮力接戰遂克扎木八月復與永德成德等分兵三路  
至多洛卡會合勦殺追至俄賴巴道險林密復分兵兩路直撲



賊巢賊俱竄逸十月廓爾喀賊首震懾

天威畏罪乞降奉

旨允准復

命詞臣擬平定廓爾喀後十五功臣像贊岱森保得贊曰奪賊  
要隘德親鼎山尋攻扎木間道躋巔或合或分克堪用命曰廸  
果毅由其志定五十八年授乾清門侍衛嘉慶元年以副都統  
職銜爲呼倫貝爾總管四年七月署正黃旗蒙古副都統尋授  
虎鎗營統領八月奉

旨派往陝甘軍營勦滅賊匪十一月張漢潮餘匪分三股在韭  
菜坪滋擾旋竄向西南復折至東北擾及五郎境內工部尙書  
那彥成派同總兵長春赴柴家關茨溝各隘口堵截賊遂竄入  
整屋洋縣界之秦嶺尋竄至大建溝時出沒老林復帶兵入山  
追勦十二月賊竄入洵陽復偕副都統綸布春往來竭力勦撲  
五年正月奉

上諭將張漢潮餘黨交台布岱森保帶兵追勦務期肅清甘境  
嗣因步兵從征日久漸形疲乏遂與陝西巡撫台布親自挑選

統計存兵五千一百餘名除盛京馬兵七百名專令駐筭峪外  
梭織馳聚以防賊竄出平地其山內征兵實四千四百六十餘  
名時藍號賊自高遇春就獲後已向西奔竄其白號賊經參將  
李天林等躡擊復竄西南卽以挑選之兵分路躡追勇往奮迅  
多有斬獲尋于西鄉五郎等處或堵或勦賊遂竄出辛峪復追  
至大河壩令步兵由西北山梁下壓馬隊由南山梁抄殺斃賊  
二十餘名復繞至店子河山梁賊見山路崎嶇潛出毛坪沿山  
逃逸復與總兵觀祥前後夾擊賊勢甚蹙二月江北張漢潮餘  
匪竄入盤屋之就峪以官兵由寶雞向東禦之嗣緣岷州之賊  
竄入禮縣階州之賊又延及洮岷乃與副都統格布舍總兵穆  
克登布爲一路由禮縣分投進擊以窘賊路是月補鑲黃旗漢  
軍副都統三月賊匪于岷州之石刷里臨江鋪一帶焚掠遂與  
綸布春及遊擊喜明等分三路衝入賊夥箭矛並發斃賊無數  
尋經略額勒登保派與綸布春分兩路于臨江鋪進勦殺賊六  
七百名復宕昌界追勦賊匪潰竄四月賊匪將奔出兩河口遂  
帶馬步軍繼進賊不能抗又張添倫等股匪已抵鎮安之野竹

坪復由大小岔尾躡之窮追三十餘里賊向西逸計斬獲三百餘人尋隨額勒登保由竹林關兼程直趨趙家川蒿坪河一帶復克楊開甲等股匪五月伍金柱股匪由松遇壩竄入黑水河遂帶兵由焦溝僱出賊前橫擊六月張添倫股匪從二郎壩西竄老山卽隨額勒登保取道洋縣褒城迎截旋分布要路安營設卡以斷賊由黑水河東竄入陝之路七月復得台布所領鄉勇八百名于褒城之雞頭關一帶協力防堵嗣緣鳳縣居民訛傳距城五十里之草灘溝復有賊匪竄出于長寨得信時親率兵赴沔縣一路截擊卽派馬隊數十人躡追十餘里外所帶兵勇僅數百名不能窮追仍回長寨防堵旋於長寨患病九月行抵漢中病勢日劇於十二日卒

諭曰岱森保在乾清門行走有年茲在軍營病故歿于王事殊爲可惜並照例議卹廕子六品頂戴長子全山保任二等侍衛兼公中佐領次子吉爾通阿任護軍參領三子瑚東阿原任戶部顏料庫郎中四子色克精額承廕六品頂戴現任藍翎侍衛

